

Çima Agirî?

Bo her partî û rêxistinek berpirsyar û pêşenge xebata rizgarîxwazî û neteweyî pir eyan e ku bingeh girtina berpirsayeriya herî mezin eve ye ku bikare rêya geşekirin û pêşveçûna seha neteweyî, têgehiştina ramyarî, çandî, aborî û giştî bi awayek evroyî nişanî civakê bidet.


Bi berçav girtina wan guhertinên nû ên navxweyî, deverî û cihanî, hewcehiya têkiliya çire endamên civaka Kurdî li pila yekemda û hevcehiya berfireh kirina pêwendiyên xelkê Kurdistanê û partiya me rojevîr kiriye. Di vê pêvajoyê de Partiya Demokrat a Kurdistanê Îranê biryar daye ku rojnameya *Agirî* bikeve meydana kar û xebata rojnamevaniyê û li hev nêzik bûna bêtir û xebat bo berfireh kirina diyaloga navbera refên civatên xelkê Kurdistanê bi armanc bigire û li meydana kiryarê de gav bi gav û digel hez û hevcehiyên civaka Kurdî ber bi pêş biçê.

Her wekî xuya ye partiya me li bername, rêbaz û çanda siyasîye xwe de, xwe bi hêza serhildayî dinav civakên milyoniye xelkê Kurdistanê dizane û di vê barê de pîlan kirina siyasî û piraktîka xwe di çarçoveya qazanc û daxwazên xelkê Kurdistanê de dadirêje. Lewma di serdema nû de bo bizavek neteweyî pêwendî û ragehandin bi zarave û binzaraveyên gelêrî xasmanî ku gel xwediyê zimanê standarda xwe nebe, li nan û avê bêtir xuyaye.


Armanca destpêkî ya rojnameya *Agirî* nasandina siyasî û ramanên PDK Îranê û bizava azadîxwaziya Kurdên vê para Kurdistanê, bi civakên Kurmancîxav ên hemû parên dine Kurdistanê ye. Wekî xuyaye eva cara yekem e ku partiya me bi awayek fermî bi zaraveya Kurmancîya jorîn rojnameyek han diweşîne, lewma siruştîye wek gava yekem kêmasî, şaşî û xeletî tê de hebin. Lê her gawe nû digel xwe hinek berpirsayerî û kêmasiyan tîne û dema rêya xwe dom bike, ev kêmasî vê çihê xwe bi geşekirin û berfirehiyê bidin. Lewma beşdariya xwendevan, nivîskar û rewşenbîrên neteweya me vê ciheke taybetî li pêgehandina Rojnameya *Agirî* de hebin.

Birêz Mistefa Hicrî li cejna Pêşmergeên Kurdistanê de:

Em li vê rojê de, pîrozbahiyê li hemû pêşmerge yan dikin û serê rêz û hurmetê li hemberî wan Pêşmerge ên ku li pêxema azadî û serbestiya gelê xwe de canê xwe gorî kirin e diçevîn in. doma wê 2



Erd hejê dîsan bûyerek mezine mirovî afirand



Kela dîrokî ya "Erg" li bajarê Bem'ê li erdhejê de wêran bû

Demjimêr 5:28 deqîqên berespêdehiya roja Înê, 5ê Befranbara 1382'ê Rojî, 26.12.2003'ê Zayînî, erdhejek ku rijdiya vê 6/3 pileyên rîşterê bû, bajarê *Bem* li parêzgeha Kirman ya Îranê hejand. doma wê 13

Basek derheq mafên mirovan û mafê gelan li Îranê, di Parlemana Biljîkê 4

Nasyonalîzm li Rojhilatê Kurdisranê 6

Bizava xwendekariya Îranê û doza gel 7

Bêkarî giraniyek mezin û çekek herifîner di hemberî civaka Îranê 14

Mistefa Hicrî:

Eger serdemekê çiya û daristan çepera Pêşmerge an bûn, niha hemû zanîngeh, xwendîngeh, mizgevt, bazar, kargeh bûne çepera Pêşmerge

Roja 26'ê Sermawez'a 1382 ya îsal, bo rêz girtin ji 26'ê Sermawez'ê (roja Pêşmerge'ê Kurdistanê) li binkeya Deftera Siyasî a PDK Îranê rê û resemekî berfireh bi pişkdariya sedan kes ji xebatkarên demokart pêk hat. Di vê rê û resmê de hevalê xebatkar Mistefa Hicrî, endamê Deftera Siyasî derheq rolê pir li şanzaniye Pêşmerge'ê li bizava azadîxwaziya Kurdistanê û rewşa nihaye Kurdistan û Îranê peyvî, ku eva jêrîn deqa wê axaftinê ye:

Xûşk û birayên rêzdar! Pêşmerge yên xebatkar û xweştivî!

Îro 26'ê Sermawez'ê bir anîna salvegera 26'ê Sermawez a 58 sal berî niho li bajarê Mehabad'ê ye. Sala 1324'ê (1945ê Zayînî) li rojek mîna îro de Bajêrvaniya Mehabad'ê kete ber êrîşa xelkê bêzar ji hukûmeta Pehlewî û hate desteser kirin.

Her qas di vê êrîşê de mirovek welatparêz û cangorî bi navê Ebdula Mîne Xalindî canê xwe ji dest da, lê belê nîşaneyê dawî a deshîlata rejîma Pehlewî temirî û tenahiya bajar kete destê xelkê de. PDK Îranê ji bo zindî ragirtina bîra vê roja dîrokî û rêz girtin ji rolê Pêşmerge ên seranserê Kurdistanê li bizava azadîxwazî a Kurdistanê, li sala 1363'an de ev roje bi navê **Roja Pêşmerge Kurdistanê** diyarî kir. Ji vê demê ve hetanî îro em hemû salê li 26'ê Sermawez'ê, li rê û resmekê bedev de pişkdariyê dikin, li ber vê çendê ku cangorî, emegdarî û zehmeta Pêşmerge yên qehreman her zindî û bilind ra bigirin. Îro jî em her bi vê meremê li hev civiyan e. Ji ber vê çendê ez iznê dixwazim, ji aliyê Deftera Siyasî a Partiya xebatkare me û ji aliyê ve hemû pişkdarên birêze vê rê û resmê, em pîrozbahiyek germ ji hemû Pêşmerge yên Kurdistan a Îranê bikin û serê rêz û hurmetê li hemberî wan Pêşmergeyan ku li pêxema azadî û serbestiya gelê xwe de canê xwe gorî kirin e biçevî in.

Mixabin li Kurdistana Îranê bi sebeba zilm û zordariya hukûmeta dîktator û girûpeke paşverû ku zirawa wan ji navê Pêşmerge dîteqe, xelkê xweştivî û Pêşmerge perwere me nikarin li rê û resmek wiha eşkere de li dewra hev kom bibin û hesta hez kirin û hurmeta xwe ji bo xurtên xwe ên Pêşmerge bidine nîşan dan. Lê bêşik bi dîr ji çavê kirêgirtî ên rejîmê û bi her awayekê ku ji destê wan bihêt, seha dilê xwe bo Pêşmerge û malbatên wan eyan dikin.

Renge ji bo hin kesan peyva Pêşmerge, tenê bir anîna wan xurtên bi hest û xebatkar be ku çeka şerefê hilgirtine û carna êrîşê dikine ser parêzvanên dîktatorî û tarîtiyê, û xewê ji çavên wan direvî in. Ev terze bir kirine ji Pêşmerge rast e, lê hemû Pêşmerge wisan ninin, ji ber ku peyva Pêşmerge bi wateya hemû ewan mirovên şoreşvan e ku li pêxema azadî û serbestiya gelê xwe de hazir in jiyana xwe ku destmaya herî biqîmet û xweştivîye jiyana wan e gorî bikin û di



Dîmenek ji pişkdarên rê û resmê

vê pêxemê de xebatê dikin.

Bi vê wateyê, ev pişke ji xelkê azadîxwaze Kurdistanê ku li jêr tepeseriya Komara Islamî de li hember vê rejîmê de berxwedanê dikin û bo nehêlana sîbera biyome vê rejîmê li ser xelkê xwe, xebatê dikin, li rewşekê de ku dizanin gav hilgirtina di vê rêyê de renga evan tûşî girtîgehê, îşkencê û heta li dar ve kirinê jî biket, her Pêşmerge ne. Ji ber vê çendê Pêşmerge bi qasekî zor in ku nahên hejmartin û eger serdemekî çiya û daristan çepera Pêşmergeyan bûn, niha hemû zanîngeh, xwendîngeh, mizgevt, bazar, kargeh û bûne çepera Pêşmerge li hember dîktatoriyên zal bi ser Kurdistana Îranê û Îranê de.

Hevalên birêz!

Civîna me li devra hev bo rêz girtin û bir anîna vê roja pîroz li halekê de ye ku guhertinek kûre siyasî û hemû aliyanê bi ser cîhan û bi xasmanî bi ser devera me (Rojhilata Navîn) de têt. Bahoze bihêz û bilez rabûye û hemû astengên ser rêya xwe wêde dibe, asteng, deshîlatên Paşverû, hukûmetên Kevneparêz, girûpên dijî mirovî û dijî gelî ne. Evên ku dikarin xwe li tev ve pêvajoyê hevdeng bikin, xwe nû bikin û bikarin bibine deste û girûpên serdem, dikarin ji vê bahozê û guhertina bihêz bi qazancê gelê xwe mifahê lê werbigirin, lê evên din sûçbar in bi ji nav çûnê.

Me li heyamê çend salên derbasbûyî de givaşa vê bahozê li derdora xwe û berevajî deshîlata hukûmetên kevnaparperwer dîtiye. Çend salan berî niha hukûmeta Mela Umer, ku xelk qenarê (dar ve kirin) dida, ridîna wan heke ji qasê bihostekê kêmîtir bûya, dîxistin hepsîxanê. Welatê xwe kiribûne bendîxaneya jinan: Jinên ku mêrên xwe li rêyên deshîlata wan de ji dest dabûn, izna şol kirina van nedidan ku zarokên xwe ên sêvî û sexîr xayî bikin. Rewşek pêk anî bûn ku jin di

nava civaka Paşverûya Efxanistanê de zilmeke zor li wan hatibû kirin. Me dît ku çawa ji nav çûn û niha em dibihîsin her rojekê li cihekê yan li kuncê de aligirên wan tîn gîtin û teslîmê edaletê dikin û dihên mehkeme kirin. Yek ji deshîlatên herî xwedî hêze deverê hukûmeta Beis ya Îraqê bû, me dît 9 mehan berî niha, li heyamê 20 rojan de hukûmeta Îraqê herifî û serokê vê hukûmetê Sedam Husên çend rojan berî niha bi zelûlî û bê deshîlatî hate girtin.

Eve qedera wan hukûmet û deshîlatane ye ku şiyana heveng kirina xwe tev wan guhartinan çî ninin. Me dît ku xelkê Efxanistanê û Îraqê çî qas şa bûn, şahî û dîlan kirin bo wan serketinên ku bi dest ve anîn, ji wan pîroz be.

Niha ev kiroveya ber bi ku diçe? Ber bi hemû wan hukûmetane ve diçe ku bi vî terz û sîstemê ne, yek ji wan hukûmetan, Komara Islamî a Îranê ye. Erê tu bêjî dengê vê kiroveya bihêz gihîştibe guhê Wilayeta Feqîh û kesên der dora wî? Ceribînet rabihoî dibêjin ku dîktator zor nezantirin ji vê çendê ku dengê wan kiroveyan bibihîsin. Guhê wan li hember nû bûn û guhertinan de ker e û heger rojekê vî dengî bibihîsin, vê hinde direng bibe ku êdî taze pêre nagihîjin. Mîna vê ku me bihîst Mihemed Rîza Şa li demên dawiyê de da zanîn ku dengê xelkê bihîstiya, lê zor direng bû.

Ecêbe ku li pêwendî tevî girtina Sedam Husên de, Xameneyî dibêje: **"Girtina Sedam Husên çirokeke pir ji şîret e"** xameneyî dibêje: **"Ev çarenivîsa hate serê Sedam Husên, dê bihête serê hemû wan dîktatoran ku guhê wan li dengê xelkê nîne"**. Evên ku dibe bi xwe şîretan werbigirin, niha xelkê nesihet dikin. Niha jî mijûlî rêve birina maşkanêyeke dubare bi navê **Hilbijartina Meclîsa 7'ê** ne, em hemû dizanin û xelkê Îranê şahidin ku her li destpêka pêkhatina hukûmeta Komara Islamî a Îranê, vê hukûmetê du pişk hebûne ku pişkek bi navê Meclîs û heyeta dewletê û Serok Komarî ku bi nav li hilbijartinê de hatine hilbijartin û anîne ser kar, bo vê çendê ku li hember xelkê cîhanê û hinek xelkê safloke Îranê jêsta demokratîk bi xwe bigirin. Lê evên ku ji destpêkê ve hetanî niho hukûmet kirin e û deshîlat li destê van de bûye, girûpeke paşverû û dijî gelî ne, ne bawerî bi demokrasîyê hene û ne bawerî bi Meclîsa Şewra Islamî hene ku bi xwe ava kirine, ne



bawerî bi dengê xelkê hene, heta ku iznê bidin xelk nonerên xwe hilbijêr in û ji bo vec girtin ji dengê wan û nivîsîna zagonê ji wan re hurmet bê girtin

Heyamekê maşkanêya xwe bi Reformxwazî ducarkî kirin, hin kes xuya bûn bi navê Reformxwaz yan Reformîst li hember girûpa din de, bo vê çendê ku bazara hilbijartinê germ bikin, li hilbijartina gera yekem a Serok Komarî a Xatemi de, ev hêcete gihiştê hawara wan û xelk hay da bo pişkdari kirina li hilbijartinê de. Vê demê digotin Meclîs hemû li dest parêzvanan de ye. Heger nonerê Reformxwazan bihên hilbijartin û piraniya dangan bi dest ve bînin dê welat bikene biheştê fireh û azadî û demokrasiyê wê ji xelkê re bi diyarî bînin. Lê bi şahidiya hemû xelkê cîhan û Îranê, me dît ku xelkê bi dengê xwe Reformxwaz anîne Meclîsê, lê her li roja yekem de pêşiya karê wan hate girtin.

Yek ji zagonên herî kevnarperwerane a Komara Islamî, Qanûna Weşanan bû. Reformxwazan pêş vê ku li Meclîsê piraniya dangan hebin soz dabûn ku eger bihêne Meclîsê de vê zagonê biguher in. Lê her ji yekem rojê destpêka karê wan de Welîyê Feqîh bi nivîsekê da eyanê ku mafê ve nine bas ji guherîna Qanûna Weşanan bikin û ev destûre bi navê hikmê hukûmetî, bû Sedema vê çendê ku kes nekare basa vê zagonê biket. Piştê hate xuya kirin ku li Meclîsa 6'ê de, zor gelale û pêşniyaz hatin gorê. Lê piraniya wan ji aliyê Şêwra Nobedar ve hatin ret kirin.

Em li wê heyamî de şahidê cangorî û cesûriya hejmareke zaf ji endamên Meclîsê bûn. Bi xasmanî ez hez dikim ku îşare bi cesûrî û dilsojiya pişkek ji nonerên Kurd bikim ku Feraksiyonek bi navê **Feraksiyona Kurdan** pêk anîn. Lê me dît ev nonerane tevî vê hemû cesûrî û netirsiya xwe çawa hatin sivik kirin, çawa pişka dadê mîna kopalekê li hindav serê wan noneran bû û zû zû ev gazî dikirine dadgehan û hurmeta wan dişikandin, niha em dibînin ku eva heyameke li her cihêkê ev nonerên ku bixwazin tevî xelkê biaxivin, civînan saz bikin, çend kesên kopal bi dest, ku kirêgirtî ên girûpên paşverû ne êrişê dikene ser wan û hurmeta wan dişikênin. Li malên wan de bi telefonan gefan li wan dikin, defterên wan tene şewitandin. Başê vê Meclîsê tevî cesûriya hejmarekê ji noneran kariye çî bandorekê danê, deskevtêk bo xelkê hebe ku niha Komara Islamî a Îranê dixwaze carek din xelkê li ser sindûqên deng danê kom biket? Vê Meclîsê neku her nekariye gavekê bi qazencê xelkê hilbigir e, bi xasmanî nonerên Kurd li Meclîsê nekarîne karekê bikin, belkî em dibînin roj nine ku li gund û bajêr û sînorên Kurdistanê xelkê bîrsî û der bi der bi destê hêzên leşkerî nehên kuştin, lê nonerên Meclîsê tevî hemû gazî û hawara xwe li vê pêwendiyê de nekarîne pêvajoya wan kuştîyên bê dadgehî û bê lêkolîn bidin sekinandin. Li pêwendî tevî Kurdistanê, avadan kirin, budce û ev deshilatên ku dibê bidene destê xelkê Kurdistanê nekarîne çî gavekê hilbigirin.

Baş e Meclîsekî wisa, nonerekî wiha bi hemû cesûriyêkê ve çî bandorekê dê hebe? Lê zerera Meclîsê yekcar zor e.

Zerera vê eva ye ku rejîmê ev Meclîsê mîna sîperekê daye pêşiya xwe, li bin navê vê Meclîsê de xwe weşartiye, eger tê gotin welat dîktatorî ye, dibêjin me hilbijartin heye, me Meclîs heye û xelk deng didin vê, Serok Komar ji aliyê xelkê ve tê hilbijartin, xelk Şêwra Bajaran hildibijêr in, xelk li deshilatdarî û hukûmetê de pişkdar e. Ez dibêjim hêcetek, ji ber vê çendê ku welatên Ewropayî ku zaftir li çarçoveya parastina wê û qazancên xwe de dixebit in, Komara Islamî mîna hukûmetek demokratîk dêxine ber çavê xelkê. Zor caran nonerên me li derveyî welat bas ji zilm û zordariya Komara Islamî û wan zilm û stemane dikin ku li ser gelê Kurd dihêr kirin, ev dibêjin hûn xwediyê Meclîsê ne, ve Fereksiyona Kurdan heye, ev dengê ve li vê derê radigihîn in, ev ji ve berevaniyê dikin. Li navxweye Îranê de jî xelk bi vê yekê mijûl kirin e, her rojê hilbijartinek e. Hilbijartinên bê bandor, xelk deng bidet yan nedet, ev pergala hukûmeta xwe didomînin.

Hukûmeta Komara Islamî heta heyamekê karî xelkê derveyî welat û parek ji xelkê Îranê bi vî awayî û bi vê maşkanê ye bilêbîn e. Lê niha piştî 25 salan serdemê vê yekê hatiye, xelkê destê rejîmê xwandiyê. Êdî Komara Islamî ne bi navê berevanî kirin ji Islamê, ne bi navê berevanî kirin ji azadî û demokrasiyê û ne bi navê berevanî kirin ji hilbijartinan nikare xelkê bilêbîne. Hilbijartina vê dawiyê a Şêwran, mînaçek baş û bihêz bû ji vê dîtin û ramanê re.

Bi îdiaya wan bi xwe 10 li sedê ye xelkê Tehranê li hilbijartina Şêwran de pişkdari kirine. Li halekê de zêrevanên bê alî li ser vê bawerê ne ku 5 yan 6 li sedê zêdetir pişkdari nekirine. Bêşik ev kesane jî ku li vê hilbijartinê de pişkdari kirine komek in ji kesên derdora wan û kopal bi destên wan in, her ev kesane ne ku êrişê dibene ser nonerên azadîxwaz, êrişê dibene ser rojnamevanan, êrişê dibene ser mirovên demokrat û azadîxwazên welat. Niha ev êrişên wan dîsa dest pê bûne. Bêşik maşkanêya xwe bi terzên cur bi cur bi rêve dibin. Bi navê cudatîyên olî, bi navê neteweyên cur bi cur, di navbera deste û gurûpan, rikeberiyê di navbera xelkê Îranê pêk tînin. Li ber vê çendê ku xelkê bikêşe ser sindûqên dengdanê, vê demê Filman ji wan hilbigirin û wan filman bêxîn ber çavên xelkê cîhanê, ku belê xelkê cîhanê! Bizanin xelk bersiva gaziya wan didin û li ser sindûqên deng danê berhev in, eva berjenga azadî û demokrasiyê ye. Lê wek min bo ve eyan kir, xelkê kariye destê rejîmê bixwîne. 25 salan xapandin û lêbandin bes e û êdî serdemê ve ne may e. Hin deste û gurûpên nav hukûmetê de dibêjin bila xelk pişkdar be, propagende dikin bo vê çendê ku Meclîs hevîgirtî û yekdest be, aliye kêma bila hin Reformxwaz tê de bin. Gotina me eva ye: Ma demekê ku piraniya zor ji noneran Reformxwaz bûn, karî çî bikin? Heger çend kesên din kêma yan zêde bin, ma dûr ji vê çendê ye ku Meclîs bi her pêkhatekê û bi her cure nonerekê ku tê de pişkdar be, çî bandorek li ser terzê hukûmetê û sîstema deshilatdar de tu neye.

Evên ku hukûmetê dikin, evên ku

zagona bingehîn dinivîsînin û evên heta li hemberî vê zagonê ku bi xwe danîne dirawestin, her gurûpeke paşverû ya pişt perde ne. Ji ber vê çendê em bawer in ku **pişkdari kirin li hilbijartina Meclîsa 7'mîn de li jêr her navekê, bi her hêcetekê, tenê bi vec û qazanca Komara Islamî a Îranê ye.**

Zaf caran hin kesên neyarên Komara Islamî egeran tînin û dibêjin: Bila em herin ser sindûqan û li hilbijartinê de pişkdar bin, lê dengê sipî bidin, lê ev jî her bi vec û qazancê rejîmê ye. Ji ber ku bo Komara Islamî zor girîng nine ku li wan kaxizên hilbijartinê de çî tiştêk tê nivîsandin, yan çî dêxine nav sindûqan de, ji wan re girîng eva ye ku xelkek zor li refa hilbijartinê de rawestin û ev jî filmê ji wan hilgirin û bêxîn bar çavê xelkê cîhanê, bo vê çendê ku xwe bi demokrat binasînin û bêjin ku xelk tevî rejîmê arîkariyê dikin, li birêve birina welat de pişkdar in, ji ber vê çendê daxwaza me ji xelkê xebatkar û têgihîştî û şiyare Îranê bi giştî û bi xasmanî xelkê xebatkare Kurdistanê eva ye ku li roja hilbijartinê de li malên xwe de bimînin û neçin ser sindûqên deng danê. Evên ku xwe berbijar kirine berbijariya xwe werbigirin, ji ber ku hurmeta wan bihête parastin û nebin emrazê propagandeya rejîma Komara Islamî a Îranê.

Li gor wan sedeman û zor egerên din, ku em nikarin hemûyan bînin ber basê, PDK Îranê hilbijartina gera heftemîn a Meclîsa Şêwra Islamî "tehrîm" kiriye û daxwaza vê çendê diket ku xelk li hilbijartinê de pişkdariyê nekin.

Em hêvidar in ku ceribandina derbas bûyî, zilm û zora ku gurûpek ne hilbijartî û dasepayî bi ser xelkê de cuda ji çarçoveya hilbijartin û Meclîs û Şêwran de bi ser xelkê de disepînin, dibe sebeba vê çendê ku heta kirêgirtiyên Komar Islamî jî di hilbijartinê de pişkdariyê nekin û bi wî awayî xelkê Îranê bi hukûmeta Komara Islamî û bi hemû xelkê cîhanê û bo cara çendê eyan bikin ku ev hukûmet, hukûmeta xelkê nine, ev hukûmetek dasepandî û dijî gelî ye, ev hukûmeteke ku tenahî û rihetî ji xelkê Îranê re nehêlaye û rêya vê her eva ye ku biherife û ji nav here. Em hêvidar in meşa azadîxwazî û demokrasiyê welatê me - Îranê jî - bigire ber xwe, û qedera dîktatoriyê li Îranê her ev qedera be ku li ser dîktatorên dinê ye deverê de hatiye.

Me çî şikek li wê hindê de nine, ji ber ku pêvajoya bûyeran û guhertinan ber bi pêş, ber bi demokrasî û azadiyê, ber bi deshilata xelkê û hiloşîna çarçoveya deshilatên totalîter li deverê diçin. Eve hetman vê bibe mizgîniyek bo hemû xelkê, bi xasmanî bo Pêşmergên xweştivî û cangorî, bo malbatên wan û bo wan Pêşmergên ku li pêxema vê rojê de ku Komara Islamî biherifit, canê xwe gorî kirin. Bi hêviya vê rojê, hindî zûtir.

Ez pir siyasî ji ve hemûyan dikim, carekî din roja 26'ê Sermawez'ê, roja Pêşmergên Kurdistanê, li ve û li hemû xelkê Kurdistanê pîroz be.

Basek derheq mafên mirovan û mafê gelan li Îranê, li Konferanseke Parlemana Biljîk'ê de

Roja 2'yê Decembar'a 2003'e Zayînî, li ser pêşniyaza Enîstîtûya Kurd li bajarê Birûksel'a paytextê Biljîkê û bi arîkariya Parlemana vî welatî, konferansê li jêr navê rewşa mafên mirovan û mafê gelan di Îranê de li yek ji salonên Parlemana Birûkselê hate li darxistin.

Serokatiya bi rêve birina vê konferansê li stûyê birêz Jan Bêgên, yekemîn çîgirê serokê Parlemana Biljîkê bû, û her weha nêzik 120 kes ji hevvelatîyên Kurd, Fars û Azerî ên Îranî, û hejmarek ji Kurdên parên din ên Kurdistanê û bi xasmanî hejmareke berçav ji kesayetiyên siyasî ên Biljîkê û her wisan Parlemantêr, Sinator û Rojnamevan di vê konferansê de pişkdar bûn.

Konferans demjimêr 2'ê piştînivro bi axaftina birêz Derwêş Ferho serokê Enîstîtûya Kurd li Birûksel'ê dest pê kir. Birêz Derwêş Ferho, tevî bi xêr hatin kirin ji pişkdarên, derheq vê yekê ku kariye bi cehd û têkoşîna hevkarên xwe li Enîstîtûya Kurd li bajarê Birûksel'ê, û bi arîkariya dilsojane û bê mînake birêz Jan Bêgên serbarê dijberî û nerazî bûna hejmarek ji rayedarên dewletê, vê konferansê bi rêve bibe, kêfxweşiya xwe da eyan kirin.

Birêz Derwêş Ferho li dirêjîya axaftina xwe de û li derbarê nîrxandina mafên mirovan û mafên neteweyên Îranê de got: Li rastî de eva ku li dema bi deshilat gihîştina melayan li vî welatî de li warê mafên mirovan de bi rêve çûye, tiştêk ji bilî cinayeta dijberî mirovahiyê nebûye.

Piştê birêz Jan Bêgên wek serok û bi rêveberê esliye vê konferansê di peyvînekê de tevî îşare kirin bi bin pê kirina berdewam û tund a mafên mirovan û azadiyên sivil ên xelkê Îranê bi giştî û bi xasmanî bin pê kirina mafê neteweyî û kêmaniyan ofî li Îranê de, ji aliyê rejîma Komara Islamî ve got: Xelkê Îranê biryara pêk anîna guhertinên kûr û bingehîn li deshilatê de ne û em Ewropayî jî ku xwe bi demokrat dizanin, vezîfeya me ye ku em kiryarên xwe û axaftinên xwe li derheq mafê mirovan bikin yek û çî din bi nermî tevî vê rejîma ku xelkê welatê xwe tepeser diket, ne livin, bi xasmanî ku xelkê Îranê ne tenê carekê, belkî zaf caran bi eşkereyî rewayî û berheq bûna rejîmê birine bin pirsyarê.

Tewera basên vê konferansê pêk hatibûn ji:

-Rewşa kêmaniyan li Îranê de, û riftar û siyasetên rejîmê derheq mafên wan

-Rewşa mafê Jinan li Îranê de
-Daneberheva rewşa Îranê li kawdana navneteweyî a niha de

-Rewşa Kurdan li Îranê de
Ev kesên ku derheq mijarên konferansê axaftin kirin evana bûn:

-Kekê Xusro Ebdullahî nonerê PDK Îranê li derweyî welat ku derheq rewşa Kurdan li Îranê de axaftin kir.

-Kekê Ezîz Mamlê, Mafnas, ku derheq rewşa kêmaniyan li Îranê de û

çawaniya riftara Komara Islamî tev wan ji pişkdarên re axivî. Kekê Ezîz derheq mafê kêmaniyan ji dîtingeha mafê navneteweyî û peymanname û konferansên navneteweyî ve axivî. Wî riftar û kiryarên Komara Islamî di vê derheqê de bi tirajidî û cinayet hesiband û di warê mafê Kurdan di Îranê de got: Di wî welatî de (Îranê) Kurdan ne tenê tu mafek ji wan re nehatiye berçav girtin, belkî bi awayên herî hovane ji aliyê rejîmê ve tene tepeser kirin û mafên wan tèn bin pê kirin.

-Xatûna Azade Kîyan, arîkara mamostayê zanistên siyasî li zanîngeha Paris'ê û lêkolîvan li pişka Îranê û karnasa pirsgirêkên Îranê. Yek ji wan kesan bû ku gotar pêşkêş kirin. Tewera basa navbirî derbarê mafê jinan di Îranê de bû.

-Xatûna "Firanso Birye" jî berpirsyarê Firansoyî ya saziya ajansa navneteweyî ji bo hevkarî û dadperweriyê li derheq mafên mirovan li Îranê de şîrovek pêşkêş kir.

Evê rêzdarê tevî îşare kirin bi çend mînakên berçave bin pê kirina mafê mirov li Îranê de wek daxistina rojnaman, girtina rojnamevanan û xwendekarên, îşkenceya di girtgehên rejîmê de, tepeserî û tund û tîjî, kevir baran û li dar ve kirina li berçavê xelkê û der kirina hikmê li dar ve kirinê, bin pê kirina berdewame mafê gelê Kurd û tepeserkarî û zext û gîvaşa li ser wî gelî ji aliyê rejîma Komara Islamî ve û her wisan îşare bi îdama xebatkarên Kurd jî kir.

-Birêz "Ludo Abixt" Dukturayê Felsefê û karnasê kar û barên Rohhilata Navîn li derheq Îranê û bandora vê li hevsengiyên herêmî û navneteweyî de şîrovek pêşkêş kir.

Hejî gotinê ye ku li dawîya her basekê de, heyamek jî bo pirs û bersivan hatibû danîn ku her yek ji pêşkêşkerên basan, di warê basa xwe de bersiva pirsyarên pişkdarên dida.

Konferansê demjimêr 6:30'ê êvarê dawî bi karên xwe anî.

Deqa axaftina nonerê Partiyê, Kekê Xusro Ebdulahî, li Parlemana Biljîk'ê:

Rewşa Kurdan li Îranê de

Serokê rêzdar! Xûşk û birayên xweştivî! Hevalên xweştivî!

Berî her tiştêkê izna min bidin ku bi navê PDK Îranê ve, sipasê ji berpirsyarên Enîstîtûya Kurd li Brûksel'ê bikim, her wisan ji berpirsyarên Parlemana Brûksel'ê, bi xasmanî sipasê ji birêz Jan Bîgin, çîgirê yekemîn yê Serokê Parlemanê bikim,

ku rewş bo li dar xistina vê konferansê xweş kirin.

Xûşk û birayê hêja! Îranê ku pitir ji 70 Milyon xulyaqet heye, welatekî pir neteweyî ye ku tê de neteweyên Fars, Azerî, Kurd, Belûç, Turkman û Ereb bi hev re dijîn û her yek ji wan xwediyê rewşt û tîtal, ziman û çanda taybet bi xwe ne. Li Îranê Neteweya Fars xwedî pênas e û bala destin, deshilatdarên Îranê, bi taybet ji serdemê malbata Pehlewî ve, tenê izna vejîn û pêş de birina ziman û çanda neteweyîye gelê Fars dane. Bi awayekê ku îro zimanê Farsî kite zimanê fermiye elimandin û hîn kirinê li Îranê ye. Ji aliyekî din ve daxwaza gelên din yên Îranê bi merema fermî nas kirina pênasê û mafê neteweyîye wan, her tim bi zimanê tepeseriyê hatiye bersivandin.

Neteweya Kurd 16 li sedê ye xulyaqetê Îranê pêk tîne, yanî pitir ji 11 milyon kesî ku nêzik 3 milyon kes ji vê xulyaqetê li derveyî welêt dijîn. Bi taybet li bajarê Tehran'ê û parêzgeha Xurasan'ê, Kurdên Xurasan'ê ku nêzik 1/5 milyon kesî dibin li destpêka sedsala 17'e zayînî de ji aliyê Şa Ebasê Sefewî ve bo wê deverê hatine durrxistin.

Gelî hevalan!

Rûberê Kurdistanê Îranê ku nêzik 125 hezar Kîlometra a çargoş e, ji aliyê hukûmeta navendî ve bi ser çar parêzgehan de hatiye par ve kirin, ku pêk hatiye ji Azerbaycana Rojava, Kurdistan, Kirmaşan û Îlam, her wekî xuya dike tenê yek parêzgeh ji aliyê hukûmeta navendî ve bi Kurdistan tê hesibandin ku pêk hatiye ji pişka navendiya Kurdistanê Îranê, ku bajarê Sine navenda vê pişkê ye.

Neteweya Kurd yek ji neteweyên herî bê parê Îranê ye, vê neteweyê ku her li serdemê rejîma Paşatîyê de gefa terzên herî tund û tîje tepeseriyê li wan dihate kirin, piştî bi deshilat gihîştina Komara Islamî jî her wisan zilm û zordarî derheq wan tê kirin, bi awayekê ku niha ji mafê herî serekeye xwe bê par in. Piştî tevgera sala 1979'a Zayînî ev rejîma ku di Îranê de bû bi deshilatdar, li warê daxwaz û xwestikên Kurdan ku daxwaza bi fermî nas kirina pênasê neteweyîye xwe bûn, piştî dest pê kirina 6 mehan bi navê got û bêjê, li encam da her mîna rejîma berê hawara xwe bire ber siyaseta tepeser kirinê û hêza leşkerî bi dijî vî neteweyî bi kar anî, heta vî cihî ku Xumeynî li roja 28'ê Gelawêj'a sala 1358'e Rojî (1980) de hikmê cîhad derheq bi vî neteweyî der kir. Li encama vî hikmî de hêzên leşkerîye rejîmê bi awayekî berfireh êrîş kirine ser Kurdistanê û ji rêya erdî û esmanî ve, bajar û gundên Kurdistanê bombebaran kirin. Ji vê demê hetanî niha, pitir ji 10 hezar kes ji xelkê sivil û bê guneh çî ji rêya bombebaran kirina esmanî û êrîşa erdî, çî ji rêya kuştinên bi kom û çî ji rêya îdam û îşkencê di girtgehên vê rejîmê de canê xwe ji dest dane. Bi sedan hezar Kurd li encama tepeserî û tund û tîjî ên rejîmê, neçar mane ku welatê xwe bi cih bihêlin. Pitir ji 900 hezar kesî bera xwe dane bajarên mezine mîna Tehran, Tewrêz û Kerec û . . . hwd. Bi awayekê ku îro 800 hezar Kurd li Tehran'ê dijîn, nêzik 15 hezar kes li Kurdistanê Başûr û 13 hezar kes jî li Başûrê Îraqê de

bûne penaber. Nêzîk 40000 kes wek penaber li Rojava de dijîn, 500 gund li Kurdistanê Îranê de hatine kavil kirin yan jî ji xulyaqetê vala kirine.

Li Gelawêj'a sala 1358'e Rojî (1980) hetanî niha li rastî de Kurdistan bûye girtîgehê mezîn bo gelê Kurd. Zilma neteweyî perên xwe bi ser hemû aliyên siyasî, aborî, civakî, çandî û . . . hwd, ên xelkê Kurd de kêşaye. Hemû partî û rêxistinên siyasî li Kurdistanê hatine qedexe kirin, komek Pasdar û Meimûrên nepenî û Îtîlaatî (êstixbaratî) ên rejîmê bi ser jîyan û malê xelkê de hikimdariyê dikin. Tewahiya rayedarên derece bilinde deverê xelkê biyanî ne û ji Tehranê ve tene diyarî kirin. Her çî qas niha axaftin bi zimanê Kurdî sûç nine, lê belê xwandin bi vî zimanî niha jî her qedexe ye û tenê zimanê Farsî li Îranê zimanê fermî ye. Kurdistanê Îranê niha jî yek ji herêmen herî paremayîye Îranê ye û ji çavkaniyên sanetî (pêşesazî) tu basekî wisan li holê nine. Tenê derxistina petrolê li Kirmaşanê de nebe ku ev jî bi kiryar ji amrazên saneta "Istixracê" bê par e. Eva li halekê de ye ku xwediye çavkaniyên dewlemend û mezîne.

Di nava dehan kargehên sanetî li Îranê, tenê yek ji wan kargehan jî li ber Kurdistanê neketiye, ji wan çend milyard Dolar dahata Îranê ku pişkeke zaf ji rêya wî welatî ve bi dest tê, Kurdistanê tu behreyek jê nebiriye. Çimkî rayedarên rejîmê ji her terze sermaye danînekê li ve deverê xwe diparêzin, bi awayekê ku qasê bêkariyê 40 li sedê ye xulyaqeta çelenge Kurdistanê bi xwe ve girtiye. Rejîma Melayan bi vî çendê jî qenaet nakin û bi eşkere mijûlê belav kirina mewadên bêhişker (muxedirat) di nava ciwanan de ye. Bi terzekê ku îro mifah wergirtin ji wê mewadê bo malbatên Kurdistanê bûye tilismek.

Hevalên hêja!

Ez bi hewce dizanim lêre de îşare bi kiryarên terorîstî ên ve rejîmê çî li hundir û çî li derveyî welat bi dijî neyarên xwe bi taybet derheq bi rêber û xebatkarên Kurd kirin e, bikim.

Lêre de bi egera dirêj nebûna ve mijarê, di navbera sedan minakan de, ezê tenê du nimûneyan bînim. Nimûna yekem kuştina Dr. Qasimlo Sekreterê Giştî yê Partiya me û du kes ji hevalên wî li 22'yê Pûşpera sala 1368'e Rojî (1989) li Viyenê û li ser kursiyê got û bêjê bi destê hinartiyên rejîma Îranê ku bi navê diyalog û peyda kirina rêçareyek bo çareserîya doza Kurd li Îranê hatibûne şandin.

Nimûneya duyem kuştina Dr. Şerefkendî - cîgirê Dr. Qasimlo - û sê kes ji hevalên wî li 26'ê Xermanana sala 1371e Rojî (1992) li Berlînê de ye. Hejî gotinê ye ku dezgeha Dadê ya Almanya, piştî 4 salan lêkolîn, di encamê de li 10'ê Avrîla sala 1997'e Zayînî hikmê xwe yê dawiyê der kir û bi anî û eşkere kirina sedem û belgeyên haşahilnegir, da selimandin ku rayedarên herî derce bilind ên Komara Îslamî a Îranê serokatiya, teror û cinayeta han kirine. Bi kurtî siyaseta tepeserkarane ya ve rejîmê li destpêka hatine ser karê ve he tanî niha derheq daxwazên Kurdan her wisan berdewam e. Niha jî pênasa Kurdan li Îranê tete haşa kirin, neteweya Kurd di bin tepeserîya hove rejîmê de ye.

Girtina serberdayî, dizî, winda kirin, îdamên bê mehkeme, li dar ve kirin li cihên bikom, îşkence kirin bi terzên sistematîk li zindanan de û kevir baran kirin bûye jiyana rojane a xelkê.

Gelî hevalan!

Bêşik ev pirsyar bo ve jî hatiye pêş ku: Erê gelo tu bêjî Kurd daxwazkarê çî tişteki li Îranê bin, ku rejîma Îranê bi wî awayî rabûn û rûniştinê tevî wan dike? Di vî bersivê de gereke bêjim ku berevajî hemû wan gunehên ku ji aliyê hukûmeta navendî ve Kurd pê tene tepeser kirin, tevgera Kurd li Îranê, tevgerêki cudaxwaz nine. Kurdên Îranê dehan sal e di çarçoveya wî welatî û di pêxema gihiştin bi demokrasiyê û bi fermî nas kirina mafên xwe di forma Otunomiya herêmi de xebatê dikin. Dirûşma PDK Îranê ku ji sala 1945'ê ve rêberê bizava neteweyîye Kurd li Îranê de ye, pêk hatiye ji: **Demokrasi bo Îranê û Otunomi bo Kurdistanê**. Her wek xuya ye siloganên partiya me ji tuxibên Îranê derbaz nabin, bi baldan bi ceribandina dîrok û zirûfa Jeopolotîka herêmi em bawer in dirûşmên me, dirûşmên berheq in û daxwaza Otunomiyê cuda ji rewa bûna ve, daxwazekê destpêki ye. Li vî xwastikê de em dixwazin çanda xwe biparêz in, em dixwazin ku zimanê Kurdî li Kurdistanê bi zimanê fermî bihê nas kirin, her çend zimanê Farsî wek zimanê hevpişk li seranserê Îranê berdewam rola xwe dilîz e. Zarokên Kurd, diviya mafê ve hindê hebin ku bi zimanê dayikê dersê bixwînin, hêza siyasî diviya bihête parastin, kar û barên hundire Kurdistanê gereke bi destê nonerên xelkê Kurd û ji rêya hîlbijartinekî azad û demokratîk ve bihête diyarî kirin û bimeşe. Armanca sereke ya wan daxwaziyanê eva hane ku gelê Kurd ji vî hindê zêdetir di axa bab û kalên xwe de seh bi biyanî bûna xwe nekin û wekî hevvelatîyên pile yek bihê berçav girtin, ne wek hevvelatîyekî pile du, heta pile sê jî.

Li pêwendî tevî doza Kurdan li Îranê de, hin alî behsa Fedelraiye dikin û bi baldan bi pir neteweyî bûna vî welatî, sistema Federalîzê wek rêveçûnek bo çareserîya doza neteweyî di Îranê de pêşniyaz dikin, bersiva me derheq ve eyan e: Li ber vî hindê ku em jî welatê Îranê bi welatêki pir Neteweyî dizanin û me bawerî bi mafê neteweyanê heye, dibêjin ku bi baldan bi rastiya han ku neteweya Fars li Îranê tenê 40% heta 45% ji xulyaqeta Îranê pêk tînin, sistema Federalî li Îranê sistemekî berheq û bersivdar e. Lê heke hetanî niha me tenê daxwaza Otunomiyê bo xelkê Kurdistanê kiriye, bi egera ve çendê bûye ku me nexwastiye bibine berdevkê gelên dinê û bedela wan bibne bîryarder. Bi kurtî heke Federalîzm li pêşerojê de bi awayekî micit bihête holê, Partiya me bi hemû hêz û şiyana xwe ve vî piştgiyê biket. Çimkî Partiya me 25 salan berî niha li peyamekê de bo Xumeynî sistema Federalîyê wek sistema herî jêhat bo îdare kirina Îranê aniye ber basê û pêşniyaz kiriye.

Hevalên rêzdar!

Di pêwendî tevî çareserîya doza Kurdan li Îranê, helwesta Partiya me her tim helwestekî aştxwazane û bi dûr ji tund û tîjiyê bûye. Me her tim gotiye ku pirsgerêka Kurdan li Îranê bi rêya



Xusro Ebdulahi

leşkerî nahête çareser kirin, ev doze diviya bi awayekî demokratîk û aştxwane bihête çareser kirin. Mixabin tevahiya cehdên aştxwazane ye me li vî derheqê de bê encam mane. Çimkî hukûmeta navnedî çî berî şoreşê û çî piştî şoreşê tenê ji rêya hêza leşkerî û tepeserî û terore ve bersiva daxwazên me daye. Di bersiva wan serkûtên ne mirovane de bûye ku hinek caran Kurd bo berevanî kirin ji man û hebûna xwe hatiye neçar kirin ku dest bavêje çekê û bi awayekî leşkerî li hemberî ve rejîmê de bisekine.

Bo arxayîn bûn ji helwestên aştxwazane ên Partiya me, hewce ye bi bîr bînim ku Dr. Qasimlo rêberê jêhate me li ser kursiyê diyalog û gotûbêjê bi destê hin kesan hate şehîd kirin ku ji aliyê rejîma Îranê ve bo **Aştî** û **çareserîya pirsgerêka Kurd** ji rêya aştxiyê ve hatibûne şandin.

Serbarê ve hindê jî me her gav bawerî bi pîrensîpên xwe hene û li ser vî baweriyê ne ku doza Kurd diviya ji rêya aştxiyê û diyalogê ve bihête çareser kirin. Hekî rojek îmkana gotûbêjê û rûniştinekî micit bi pişkdarî kirina zêrevanên navneteweyî bo me bihête holê, bê şik Partiya me dê pêşwaziye jî gotûbêjekî wisan biket. Lê ve hindê jî pêşkêşî xizmeta ve dikim ku ceribînen me dibêjine me ku nabe we tu bawerî û hitbarek li vî rejîmê hebe, çimkî rejîmek ku bo çareserîya doza neteweyî û heta navneteweyî jî bi zimanê tund û tîjî û hêza leşkerî û kiryarên terorîstî diaxive, ne tenê cihê bawer pê kirinê nine, belkî bi awayekî zatî şiyana çareser kirina aştxwazane a dozên xwe jî çî nine.

Hevalên rêzdar!

Li dawiyê de ez dixwazim axaftinê xwe bi çend peyvên geşbînanê bi dawî bînim û ev jî eva ku îro xelkê cihanê dibînin ku tevgerêki bihêze azadixwazane li holê e, tevgerêki ku çî baweriyek bi soz û dirûşmên Xatemî çî ninin e û daxwazkarê guhartinê bingehîn û kûr li Îranê de ye.

Ku wisan e me Kurdan mafê ve hindê heye ku di xebat kirin bo bi dest ve anîna azadî û demokrasiyê de niha pêde seh bi tenêtiya xwe nekin.

Bi hêviya serketina xelkê Îranê
Zor sipas bo rêz û baldana ve

Her çend ku hin hizr û baweriyên siyasî û civakî nasyonalîzmê, mîna diyardeyeke kevn di warê hizr û ramanê, didin nas kirin, lê bi giştî û bi metodekî zanistî em dikarin bêjin nasyonalîzm diyardeyekî pêşketî û modern e ku piştî Şoreşa Firansayê bi xasmanî di dawiya sed sala 18'an û destpêka sed sala 19'an de rû li geş û xurt bûnê kiriye.

Di pênaseya nasyonalîzm (neteweyê) de bawer û ramanên cur bi cur hene û ji hin aliyên ve tî meze kirin. Bo mînak hinek hizrvan û zana hebûna neteweyê bi diyardeyekî dîrokî dizan in û faktorê û xwestikên bi hevrebûn û zanebûna kesayetiyên bi xala bingehîne neteweyê dihesibin in, hin ji zanayên wî warî mîna zaf hizirvanên Bîrîtanyayî û Firansayî, hebûna dewletê bo pêk anîna netewe bi faktorekî sereke dizanin û neteweya bê dewlet jî bi fermî nas nakin.

Lê em bi kurtî dikarin bêjin: Netewe ev koma xelkê ye ku xwediyê çand û dîrokê û aboriya hevpar bin û li ser axeke diyarî kiriyê de jiyane bikin û ev xalên hevpar bi hevve girê dabûn û di daxwaz û xwestika bi hevve jîyan û li pey hikmê xwe rêve birinê li ser erdê xwe bin.

Li gor vê pênase ku bo Neteweyê hate kirin, em dikarin bêjin nasyonalîzm bizavekî hizrî, civakî û siyasî ye, nasyonalîzm dikare berhema geş bûna jiyana madî û rohiya neteweyê be û ji bo gur û xurt kirina vê dozê jî liv û bizavê biket, yan jî dikare berhema bizavekî azadîxwazî ji bo serbestî ji destê dijminan be.

Nasyonalîzm mîna bizavekî hizrî di nava rewşenbîrên her neteweyekê de çê dibe û piştî belav bûna vê bi astê civakî de mîna bizaveke civakî rê bo çê bûna bizavên siyasî vediket û pêngavên bi kiryar û piragmatîk bo gihîştin bi armancên xwe davêjt.

Helbet ev pênase ku derheq bi nasyonalîzmê hate kirin zêdetir terzek ji vê pênasê ye ku nasyonalîzma rizgarîxwazî a bindest li xwe digire, nexa nasyonalîzma mezinxwez û super hêz ku em dikarin mîna nasyonalîzmekî dewletî nav bibin, pişkekî din ji nasyonalîzmê li xwe digire ku bingeha vê li ser hêza deshilat û dewletê ava bûye. Li welatên cîhana sêyem de jî dikarin bêjin ku berhem û nobereya kolonyalîzm a serdemî ye ku di vê mijarê de merema basa me nîne.

Bi kurtî em dikarin bêjin ku nasyonalîzma neteweyên bindeste wan welatane renegdaneweya nasyonalîzma neteweyên xwedî hêz û deshilatdar bûye. Piştî wê ku neteweya deshilatdar bi haydana kolonyalîzmê ji bo pêk anîna neteweyê hevgerî li ser bingeha kulturîya xwe dest bi asimîlasyonê kirin û ji nav birina neteweyên bindest kir, rewşenbîrên neteweyên bindest ku hetanî qasekê tevî Elf û Bê a nasyonalîzm û mafên neteweyî nasyar bibûn, bizivîn û bingeha bizava rizgarîxwazîya xwe bi kakila neteweyî ve di nav welatan de pêk anîn. Ku wisan e lêreda bo me der dikeve ku nasyonalîzma van netewane jî li ser bingeha geş kirina xwezayî û dîroka wan pêk ne hatiye, belkî nasyonalîzmekî ne gihîştîye û reng vedana nasyonalîzmekî negihîştî a dinê ye.

Encama vê têkiliya di navbera neteweyên deshilatdar û bindeste wan welatan de çê bûna kolonyalîzmeke kolonyalkirî bû û neteweyên deshilatdar her çend hatibûne kolonyal kirin lê belê wan jî bi metodekî qahîm û hovane û bi

awayekî Eşîretî, neteweyên di bin destên xwe da kolonyal dikirin, heya radeya ku ji sînorên Kolonyalîzma Ewropayî jî derbas bibûn û heya erdê neteweyên bindestê xwe jî bi erdê xwe dizanin, lewma mafê hemû cure tund û tîjî û tepeseriyekî li hemberî bizava rizgarîxwazî a van netewane bi xwe didan.

Nasyonalîzm li Kurdistanê de

Eva ku çawan seha neteweyî û nasyonalîzmê di nava Kurdan de pêk hatiye û reh û rişalên xwe raçandine, her wekî ku berî niha me bas kir pitir rengvedana Nasyonalîzm û kedxwariya neteweyên deshilatdar bûye, neteweya Kurd ne berhem û dahata geş û xurt kirina Sermayedarîyê ye û ne jî berhemê geş kirina warên rohi û rewaniye netewî ye, belkî berhemê bizavekî rizgarîxwazî ye ku dijberî nasyonalîzma şovînistîye neteweyên deshilatdar da serhildaye.

Dema ku nasyonalîstan tevgera xwe dijberî Kolonyalîzma Firanse û Bîrîtanyayê dest pê kirin, xebitîn ku neteweyê yek dest di vê para Osmanîyan de bi xasmaniyên çandîya neteweya deshilatdar ku Tirk in dest ve bînin. Ev para Kurdan jî ku di bin deshilata Osmanîyan de bûn piştî parve kirina vê Împîratorîyê bi çend dewletên cuda cuda, berevajî neteweyên dinê, mîna neteweyekî taybetî nehate hesibandin û bi mafê neteweyî ên xwe ku pêk anîna dewletekî Kurdî bû negihîştin û li ser 3 dewletên: Tirkîye, Îraq û Sûriye de hatine parve kirin. Tirkan ku di pêşîya pirojeya pêk anîna Dewleta Neteweyî a Tirk de Kurd wekî berbest û asteng didîtin, lewma dest bi asimîlasyon kirina kultur û webirandina tuxmiye vî neteweyî kirin. Di vê qonaxê de bû ku teesiba giştî a Kurdan ku deskevtî pêkhata eşîretîya civaka wan bû, guherîn bi ser de hat û ber bi nasyonalîzmekê çû ku kakileke rizgarîxwazîyê hebû, her çend ku pêwendiyên berhem aninê hingê jî li ser bingeha Fîodalîzmê bû, lê belê tund û tîj û kedxwariya neteweya deshilatdar ku hebûn û kesayetîya Kurdan înkâr dikir û bi hemû awayekê dest bi helandin û webirandina wî neteweyî kiribû, bû sebebê şiyar bûn û vejandina seh û hesta neteweyî a Kurdî, û bûye hêvênê bizaveke nasyonalîstî a rizgarîxwazî di Kurdistanê de.

Bi wî awayî Tirkan dest bi sepandina ziman û çand û wêjeya neteweya Tirkî û asimîlasyonê neteweya Kurd kirin, dest bi kuştin û mişextî kirina Kurd û Ermenîyan û cîgir kirina Tirkan li cihê wan de kirin.

Di vê para Kurdistanê ku ketibû nava sînorên Îraqê, alozî her wek caran hebû, lê tenê bi cudahîyekê ve. Ew jî eva ye ku dewleta Îraqê bi sebeba biryara Rêxistina Neteweyên Yekbûyî di sala 1924'ê de bi serwekî nedikarî ziman û çanda xwe zal biket, lê belê ewê jî li hin cihên Kurdistanê mîna Kerkûk û Mûsil û . . . dest avête asimîlasyon kirina çanda Kurdan û webirandina tuxmê Kurdan û Ereban di herêman Kurdistanî de cîgir kirin.

Nasyonalîzm û Rojhilatê Kurdistanê

✉ : Rambod Lutfipûr

Nasyonalîzm di Îranê de

Nasyonalîzm di Îranê de mîna welatên dinêye cîhana sêyem berhema siyaseta Kolonyalîzmê bi taybet Bîrîtanyayê bû, piştî serektina Şoreşa Octobere Rûsiyê û pêk hatina deshilata Komoñîstî di wî welatê de, Îranê girîngîyeke taybetî bo Bîrîtanyayê peyda kiribû, lewma ji bona pêşgiri kirin ji bîr û ramanên Marksîstî bo hundirê Îranê, hin ji kesayetiyên siyasî û leşkerîye Îranê paldan da ku li ser welatê Qacar dewletekî navendgera ya nasyonalîstî bi kakila çanda Farisan ve di bin navê Îranê de pêk bînin.

Evê nasyonalîzmê her li destpêkê de dixwest ku di welatê pirneteweyê Qacar de neteweyekî hevgerîye Îranê bi xasmaniyên neteweya Fars pêk bîne, diyare Rizaxan û piştî hingê jî Mihemed Riza Şa gelek hewil dan ku bi mifah wergirtin ji hêza leşkerî û deshilata dewletî neteweyên dine Îranê di nav neteweya Fars de bihelîne û bi vê meremê jî Kolonyalîzma ku pêk aninê bingehîye wê dewleta nasyonalîstî bû, mezintirîn parêzer û piştgirê vê dewletê bû. Bo mînak li çaxê ava bûna Komara Kurdistan û Azerbaycanê li sala 1945 - 1946'an arîkariya Bîrîtanya û Emerîka bo parastina Îranê û hiloşandina wan Komarane gelek berçav û eşkere bû. Serbarê wan hemû cehd û xwe westandinê dewleta nasyonalîste Fars nekarî neteweyên dinê bihelîn û neteweyekî yekgirtî pêk bîne. Hêştî neteweyên bindest di Îranê de xasmaniyên çandîye xwe parstine û daxwaza mafên neteweyîye xwe dikin.

Nasyonalîzm di Kurdistanê de

Nasyonalîzma Kurdî di Îranê de, berhema geşkirina Xurîstî û dîrokiya civaka xwe nebû, belkî para zaf, bandora nasyonalîzma deshilatdare Fars bû mîna bizavekî rizgarîxwaz dijberî siyaseta helandin û asimîlasyonê kirina Kurdan di Îranê de pêk hatibû (Tevgera Simayîl Axayê Şîkak) hetanî qasekê li bandor û kartêkirina pêvajoya zêde kirina Nasyonalîzm û Kurdayetîya pişkên dinêye Kurdistanê mifah wergirt. Her çend mîna nasyonalîzma deshilatdar ya Faris, nasyonalîzma bin destê Kurdan jî di qonaxekî wekî serdemê Komara Kurdistanê bandora faktorên biyanî (Yekîtiya Soviyetîstana berê) li ser bû, lê bi giştî em dikarin bêjin ev nasyonalîzm bi merema pêk anîna bizavekî rizgarîxwazî û heta qasekê jî bi haydana nasyonalîstî parên dinêye Kurdistanê hatibû holê (Komara Kurdistanê).

Piştî hiloşîna Komara Kurdistanê ku nimûna berbiçav ya Nasyonalîzma Kurd di Îranê de bû, dîsan jî Kurdayetî yan Nasyonalîzma Kurdî mîna bizavekî azadîxwaz û dijî Kolonyalîzmê her dem di zêde kirin û berfireh bûnê de bû. Bi terzekê ku piştî serhildana gelên Îranê di sala 1979'an de hizra Nasyonalîzmê di Bakûr û navenda Kurdistanê Îranê derbas bû û xwe gihande Başûrê Kurdistanê Îranê jî.

Bizava xwendekariya Îranê û doza gel

✍: Hêmin.Seyidî

Em di rewşekê de bîr anîna 50'mîn salvegera 16'ê Sermawez'ê rêz digrin ku Bizava Xwendekariya Îranê nêzî rojên armanc û gelî bûna xwe bûye. Wê bizavê ji bilî du demên, destpêka serhildana sala 1357 (1979), (hetanî pêş şoreşa çandî) û dema bi deshilat gihiştina Mihemed Xatemiye Serok Komar, her dem naverokek radîkal û armancxwazane hebûye û çî demekê tevî deshilat û hêzên dewletîye hev deme xwe tebayî ne bûye. Ji ber ku li hemû wan şalan de (li her 2 hukûmetên Paşayeti û Îsalmî), vê bizavê sîstemên deshilatdare welêt bi demokratîk ne nedîtine heta ku bikare ji rêya bihevne bûn û dan û standin tevî xwedî hêz û deshilatdarên siyasatên xwe bimeşînin.

Eyane ku di çarçoveya hukûmetên dîktator û totalîter de, fersend û derfetek ji bo xebat û têkoşîna reform û guhertin û sazîyên sivil tu neye. Lê bizavên mezine xwendekariyê li gelek deverên cîhanê, çî bi awayê sazîn tevî deshilatên demokratîk û çî bi awayê dijebrî kirin tevî sîstemên Totalîter, deskevten pir mezin û hêja hebûne. Ev meş û herekete li Îranê, tevî dîrketin ji hêzên deshilatdar, bi sedema berband kirina bîr û nêrînen civakê, weke bizaveke azadîxwaziyê dikare pîvanek girîng ji bo nîrxandina xebata xwendekarî be û dikare rewşa civaka niho ya Îranê û çawaniya daxwazên gel bi me bide kifş û eyan kirin. Ji aliyekî din em dikarin warên cur bi cure pêşde birina civakê di nava bizava xwendekarî de peyda bikin. Di pêvajoyekê de ku li deshilatên ne demokratîk de îmkân u derfet ji bo pêk anîna yekîtî û sazîyên gelî û sivil û senedîkayî tu neye û azadiya peyvîn û nêrînen û azadiya çalakiya Partiyên . . . heta bi awayekî kartonî jî nahê dîtin. Bizava Xwendekarî ji gor hereketên dine civakî - heta bi awayekî xwezayî û ne rêxistinîkirî - ser û bertir ji bizavên dine civakê bi neçarî rolê pêşeng bûn û ramanên azad bi stûyê xwe girtiye. Yanî di rewşekê de ku pêvajoya pêşketina civakê di warên siyasî, abûrî û çandî û . . . berband bûye.

Hetanî demekê ku zanîngeh bixebitin, ev refa yekeme vê li pêşkeftina civakê de rolê eslî û bîngêhî bilîz in. Ku wisan e bizava Xwendekariya Îranê û armancên vê, him zimanê daxwaz û xwestikên gel in û him fermanderiya bi dest xistina wan armancan - heta dema pêk hatina rewşa demokratîk - bi stûyê xwe girtiye. Bi wî awayî emê nîrxandinekê ji vê bizavê û rêyên pêşerûyê vê bikin ku li rastîyê de her ev daxwazî ku gelên Îranê hene:

Li destpêka 16'ê Sermawez'a îsal de bizava Xwendekarî bi giştî û tayê nivî qanûniyê vê "Defteri Tehkîm Wehdet" di kiriyarekî şiyar û cesûrane de biraya xwe derheq hîlbijartina meclîsa 7'mîn de ragehand, ku tê de pişkdarî kirin di hîlbijartina han de hatiye "tehrîm" kirin. Eva bi xwe pîvaneke ji bo nîrxandina bîr û nêrînen gel û rastîya wê jî, li çend mehên pêşîn de û bi pişkdarî ne kirina xelkê di hîlbijartinê de diyar dibe.

Rayedarên Komara Isalmî ku ji rolê girînge xwendekaran û beşdarî kirina gel li hîlbijartinên 4 sal berî niha agehdar in, sêda rewşa han bi tundî perîşan û matmayî bûye. Li gor rewşa han dewletê



Hinek ji xwendekarên Zanîngeha Urmîyê li halê Rojî girtina Siyasî

bo bédeng kirina rê û resma bîr anîna 16'ê Sermawez'a îsal xwe jî çî cehd û kiriyarekê ne parast ku mînakek biçûk ji nefermaniya medenî bû. Me dît ku gel jî vê rêyê bo nîşaneya neyarî û nerazî bûna xwe li dîktatoriya deshilatdar mifah wergirt in û li pêşerojê de jî vê xurttir bikin.

Xwendekarên Îranê hewl û cehdên wan di pêvajoya birine sere qasê zanîn û agehiyên siyasî, civakî û hin tiştên din - hevdem tevî pêşketinên zanistî - bo bi dest xistina dezgehên azade nûçe û zanyariyan pitir hewlê didin, ku dikaribe pêngavekî gelek girîng di pêvajoya siyasiyê welat be. Mifah wergirtina xwendekaran ji her fersend û derfetekê bi beyan kirina dîtin û nêrînen xwe derheq rewşa aloz û şepirzeye dîktatoriye li Îranê, rijîma Komara Islami perîşan kiriyê.

Ev nigeraniyê li gotin û axaftinên wan li rê û resm, hevdiîtin û boneyên din . . . bi eşkere xuya dike, û her dem ji mifah wergirtina çelenganeya xwendekaran ji tirbûn û derfeten cur bi cur ditirs e. Ev terze nerazî bûne niho bi awayekî berfireh di civîn û komikên xelkê de tîn dîtin. Gel ne tenê di civînên biçûk, xasmanî û ne fermî, belkî di kolanan, xwendîngeh û îdareyan û . . . de jî, bi eşkere nêrînen xwe tînin rojevê û hizr û ramanên xwe bi hevne radigehînin. Bi giştî her derfetek dikare yekîtî û hevgerînekê bo dijberî kirin tevî rijîmê pêk bîne. Niha mifah wergirtin ji întenêt bo çê kirina tîkiliyên bi hevne, nemaze tevî opozîsyona derveyî welat, tenê taybet bi xwendekaran nine, serbar hemû sansor û filter (parzînk) danîne, rejîmê nekariyê pêwendiyên nivîskî û bêjeyî bêxe bin kar tê kirina xwe.

Di warê çandî de, gel jî mîna xwendekarên welat dijberiya tewaw li gel siyasatên bi nav çandîye rejîmê girtine berahiya xwe. Hewl û bizavên 25 salên derbazbûyîye rejîmê ji bo çê pêkewirin di nava bihayên çandî de, her wekî di nava komeleyên rewşenbîrî û zanistî de li mêj ve ye şikestiyê û rengdanewa sernekeftina wan siyasatane niha di nava gel de bi başî tê xuya kirin. Gel û xwendekar ev curê ku xwe dizanin pîvan û hêmayên çandî diyarî dikin û peywendiyên civakî ji xwe re didanin. Îro cîhan mîna gundek biçûk lêhatiye - aliyê kêrî di warê çandî de - gelê Îranê jî bi xwe xistiye û xwendekaran di vê pêvajoya nû de roleke eslî û bîngêhî hene.

Mînakek din ku xelkî bûna bizava Xwendekarî bo me diselimîn e, rewşa serokatîya bizavê ye. Îro serokatîya bizava xwendekarî li gor cih û kêmaniyê li 3

Doma Nasyonalîzm û Rojhilatê Kurdistanê

Hebûna Partiya Demokrata Kurdistan a Îranê ku nonerê rastîne bizava Millî - Demokratîke neteweya Kurd di Kurdistanê Îranê de ye û ji dema Komara Kurdistanê ve maye, bandorekî zor li ser xurt kirina Nasyonalîzma pêşkeftî û demokrasîxwaz di vê pişka Kurdistanê de hebûye û bi parastina armancên sereke û berevanî ji mafê dîyarî kirina çarenivîs û qedere ji bo netewa Kurd, bîngêha nasyonalîzmê di nava civaka Kurdistanê Îranê de parastîye û berfireh kiriyê.

Di encamê de hewceye bê gotin ku Nasyonalîzma Kurdî li Kurdistanê Îranê û bi giştî di parên dinêye Kurdistanê da jî di warê hizrî ve gihiştîye qonaxa zane bûna neteweyî, ji aliyê civakî ve jî, bi seba geş bûna borjwaziya bajêrî ve gihiştîye qonaxa rewşenbîrî û demokrasîxwaziyê û ji aliyê rizgarîxwaziyê ve jî gihiştîye qonaxa xebata pirgmatîk û qedere saz.

Çavkanî:

1. Împiratoriya Lim, Refîq sabîr
2. Kurd û Şoreş û derfeten dîrokî. Husên Mihemed Ezîz
3. Du lêkolînen siyasî. Hilmî Elî Şerîf

rewşen cur bi cur de ye: Perek ji wan di nava girtîgehên rijîmê de ne, pişkek din li derveyî welat xebat û tîkoşîne dikin û evên din niha jî bi awayê fizîkî di nav civak û bizavê de ne. Ev parve kirine bo serokatîya bizava azadîxwaziya seranseriye Îranê jî durist e.

Serokatîya bizava Xwendekarî li girtîgehê, para sembolîk û cihê şanaziya xebata xwendekaran Îranê ye ku her dem mînaka berxwedanî û domandina wê xebatê ne. Belkî niho wan rolek wisan eslî li meşandina armanc û siyasatên bizava xwendekarî çî nebin, lê hêza eslî û pêşengî vê liv û hereketê ne.

Serokatîya bizava Xwendekarî li derveyî welat - ku bi zor neçar dîr ketin li Îranê bûne - bi sedema mifah wergirtin ji teknolojiya nûjen ya ragehandinê, karîne tîkiliyên xwe bi hundirê welat re biparêzin û tevî vê di nava opozîsyonê û heta komeleyên navneteweyî de jî rolê berdevkê bizavê bilîzin. Erk û wezîfeya wan e ku bo gihandina dengê hevşopên xwe bo gelên cîhanê ji hemû derfetan mifahê werbigrin û di hemû warî de bo piştgirî kirina menewî û siyasî bo para hundire welat bixebitin.

Lê para serokatîyê li navxweyê welat, ku di rewşekê zor dijwar û cihê tirs û gumanê de dijîn, rêveberiya hemû bizavê bi stûyê wan e. Li dan berhev tevî rêberên hepsî û derweyî welat, biryarderê dawîn in. Tîkiliyên wan bi gel û rêberên bizava azadîxwaziya seranserî li Îranê, zor girîng e. Pêk anîna hevdengiyê li xwepêşandanên giştî de, bi rêxistina terz û metodên dijberiya medenî, gihandina zûye pêşketinên siyasî û çandî bo nav dilê civakê û xulqandin û biryar girtina demê li qewmîna bûyer û derfeten roj, hemû perek in ji erk û wezîfeyên bizava Xwendekarî û serokên vê li hundirê welat de ne.

Li dawiyê, em hevî dikin ku bi yekîtî û hevgerîna liv û meş û hereketên giştî û xelkî û zêde bûna xelkê di nava refên xwendekaran, ev tîkilî kirine encamek baş di pêvajoya qezenc û berjewendiyên gel û gihiştin bi daxwazên wan hebin.

Daxuyanî

Derheq birêveçûna Pîlînoma Komîteya Navendî ya PDK Îranê

Komîteya Navendî a PDK Îranê, hilbijartiya Kongireya 12'ê ya Partiyê, demjimêr 9'ê sibêdehiya roja pêncşemî, 20'ê Sermaweza sala 1382'ye Rojî hemberî 11.12.2003'ye Zayînî, 13'mîn pîlînoma xwe bi pişkariya piraniya endam û cigir û Şêwirên Komîteya Navendî li dar xist û piştî 12 demjimêran karê berdewam, dawî bi karên xwe anî.

13'mîn Pîlînoma Komîteya Navendî bi ragehandina deqîqeyek bêdengî û li ser pê sekinîn bo hurmet girtin ji canê paqije her du şehîdên xebatkare PDK Îranê, Şehîd Ramîn Şerîfî û Celîl Zêweyî ku vê dawiyê, li girtîgehên rejîma Komara Islamî de hatine li dar ve kirin û her wisan bo rûmet girtin ji bîr anîna hemû şehîdên rêya azadiyê, dest bi karê xwe kir. Piştî pêşniyaz û pejirandina bernama karê Pîlînômê, li destpêkê de hevalê birêz Elî Mêhrperwer Endamê Deftera Siyasî ji aliyê Deftera Siyasî a Partiyê ve, baseke giştî li ser rewşa Îran û hilbijartinên gera 7'mîn ya Meclisa Şêwra Islamî a Îranê pêşkêşî pişkdarên Pîlînômê kir. Ev bas û pêşniyaz ji aliyê endamên rêveberiya Partiyê (beşdarên Pîlînômê) bi awayekî hûr û berfireh ketin ber bas û gengeşe kirinê û hilbijartina 7'mîn gera Meclisa Şêwra Islamî bi berçav girtina tev aliyên pêwendîdar, we biryara **pişkdarî ne kirin** di vê hilbijartinê da hate girtin.

Di pişkeke dine karê Pîlînômê de biryar û pêşniyazên Komîteya amadekare Kongra 13'an ya Partiyê li pêwendî tevî parek ji kar û barên vê Kongirê, ku pêş de ji aliyê Deftera Siyasî ve hatibû pejirandin, kete ber destê pişkdarên pîlînômê û piştî basekî dûr û dirêj ji aliyê beşdarên pîlînômê ve hate pejirandin.

Li dawiya karê Pîlînômê de komek bas û mijarên cur bi cur û pêwendîdar bi kar û barên Partiyê ji aliyê Deftera Siyasî ve kete ber bas û gengeşe kirinê. Pişkdarên Pîlînômê di vê para karê 13'mîn Pîlînoma Komîteya Navendî de ji zor bi çelengî pişkdarî wan basane bûn û li pêwendî tevî wan pirsane de bîr û dîtînen xwe anîn ziman. Pîlînôm piştî wan behs û nirxandinan, rasperdeyên xwe dane Deftera Siyasî, hetanî di pêwendî tevî her yek ji wan pirsane pêngavên hewce bavêje.

Pîlînôm demjimêr 9'ê piştî nivroya roja pêncşemiyê dawî bi karên xwe anî.

Deftera Siyasî a PDK Îranê
1382.09.21'ye Rojî
2003.12.12'ye Zayînî

Daxuyanî

Di pêwendî tevî li dar ve kirina heval Ramîn Şerîfî de

Bi xem û kovanekî zor ve radigehînin ku kadroyê kêrhatî û xebatkare Partiya Demokrat a Kurdistanana Îranê, Ramîn Şerîfî ku 5 mehan berî niha ji aliyê hêzên tepesarker yê rijîma Komara Islamî a Îranê ve li bajarê Seqizê, hatibû girtin û bo girtîgehê hatibû şandin, roja şemiyê 15'ê Sermaweza sala 1382'ye Rojî (06.12.2003'ye Zayînî), ji aliyê rijîma dijî mirovî a Komara Islamî ve hate îdam kirin.

Şehîd Ramîn kurê Husên, 27 salî û xelkê Dîwandere û akinciyê bajarê Seqizê bû. Xwendina xwe li bajarê Seqizê domand û ji bo xebat dijberî dîktatorî û kevneparêziyê û bi merema gihîştin bi azadî û mafê neteweyîye Kurd, sala 1372' Rojî, tevî refên xebatkarên PDK Îranê bû û di heyamê nêzî bi 10 salan xebat û têkoşin di nava refên Partiyê de, gelek erk û berpirsyaretiyên cur bi cur bi stûyê xwe girtin û bi, pakî û jêhatî rêve birin.

Piştî girtin û xistine nava girtîgehê, serbarê îşkence û azar dana cendekî û rohî, tu car teslîmî daxwazên rijîmê nebû û her wek berê bi armancên gel û rêbaza Partiya xweştîviye xwe emegdar ma.

Ji dest çûna vî xebatkare rêbaza Demokrat, bêşik ji bo gelê Kurd û PDK Îranê xesar û derbekî giran e û kul û elemekî zaf xiste nava dilê hemû azadîxwazan bi giştî û bi taybetî xebatkarên Demokrat.

Partiya Demokrat a Kurdistan Îranê tevî şermezar kirina vê cinayeta Komara Islamî a Îranê, behî û serexweşiyê ji malbata bi rûmete vî şehîdî û hemû heval û hevçeperên vî diket û hemû aliyekê piştrast û xatircem dike ku li dar ve kirina vî hevalê xebatkare, ne her tenê xelkê Kurdistanê çavtirs in naket û ji îman û bawerîya xebatkarên Demokrat bo domandina rêya serketin û xebat û berxwedaniyê sist naket, belkî ewan ji bo vê dozê gur û xurttir diket.

Li vê demê û di vê derheqê de, her weke berê me hebûna tirs û xofa li dar ve kirinê li ser canê vî xebatkare azadîxwaz bi haya kom û komel û rêxistinên mirovhez ragihandibû, dîsan jî vê daxwazê ducar dikin ku bi givaş xistin bi ser Komara Islamî a Îranê, vê rejîma serberdayî û dijî mirovî ji kuştina azadîxwaz û xebatkarên Demokrat vezivirînin û rê nedin çî din Komara Islamî, wiha bi hêsanî canê azadîxwaz û xurtên dilsoje gelê Kurd jê bistîne.

Hezar silav ji canê paqije Şehîd Ramîn Şerîfî û hemû Şehîdên rêya azadiyê.

Mirin û neman bo Komara Kurdkuj û dijî azadî ye Komara Islamî a Îranê

Partiya Demokrat a Kurdistanana Îranê
16.09.1382'ye Rojî
06.12.2003'ye Zayînî

Daxuyanî

Komara Islamî a Îranê Celîl Zêweyî îdam kir

Bi kul û keserkî giran ve radigihînin ku xebatkare Celîl Zêweyî, endam û hevalê çelenge Partiya Demokrat a Kurdistanana Îranê ku di sala 1373'ye Rojî di pêvajoya têkoşina partiyê de li nêzik gundê "Nivkurdar" bi birîndarî ketibû destê hêzên rejîmê, roja pêncşemî 13'ê Sermaweza sala 1382'ye Rojî hemberî (04.12.2003'ye Zayînî), li bajarê Mehabadê bi destê mirovkujên Komara Islamî hate dar ve kirin.

Şehîd Celîl kurê Mihemed xelkê gundê Mirane ser bi herêma Gewirkayeti a Rebet'ê û akinciyê bajarê Serdeşt'ê bû. Li destpêka girtina wî ji aliyê hêzên rejîmê ve bi tundî ketibû bin givaş û îşkence kirinê, tûşî xwînrejîyekî tund jî hatibû, serbarê vê çendê jî qet bawerî û îman û netirsîya vî ber bi lawaziyê neçû û her wisan riya û qahîm li hemberî kevneparêzî û dîktatoriya deshilatdaran de sekinî û bi armancên gel û xebata rewşa berheqe gelê Kurd û rêbaza pîroze PDK Îranê, bi emegdar ma û aqibet jî canê xwe di pêxema wan de gorî kir.

Termê Şehîd Celîl li bajarê Serdeşt'ê hate weşartin û dezgehên tepeserkare Komara Islamî izna birêve birina rê û resma serexweşîya eşkere bi malbata rêzdare wî nedan. Bi vî halî jî xelkek zaf ji bajarê Serdeşt'ê çûne mala vî şehîdî û rê û resma behî û serexweşiyê bi cih anîn.

Bêşik ji destdana xebatkare Kurd Celîl Zêweyî bo hemû xelkê Kurdistanê bi giştî û ji bo xurtên Demokrat bi taybetî, xisar û derbekî mezin bû û xem û nerehetiyekî zaf xiste nava dilê hemû azadîxwazan û xelkê bi şerefe Kurdistanê. Lê şik û guman tê de nine ku li dar ve kirina vî xebatkare ne tenê xelkê Kurdistanê natirsîne û ji xebat û berxwedaniyê tevî dîktatorî û kevneparêziyê nazivirîne, belkî ewan ji bo dom kirina rêya serkeftin û gihîştin bi maf û azadiyê gur û xurttir diket.

Bi sedema Şehîd bûna wî xurtê xebatkare, em serxweşiyê ji malbat, xizm û kes û karên malbata birêz Celîl Zêweyî û hevçeperên vî dikin û hêvîdar in bi domandina rêya xebat û berxwedanî û bi dest ve anîna hêvî û armancên wî, riha vî şehîdî û hemû şehîdên Kurdistanê şad û ji xwe razî bikin.

Her di vê demê de jî em vê kiriyara hov û cinayetkarane ya Komara Islamî bi tundî şermezar dikin û daxwazê ji Kom û Komele û Rêxistinên Mirov hez dikin ku tevî şermezar kirina vê cinayeta Komara Islamî, vê rejîmê bi merema dawî anîn bi pirosesa li dar ve kirina xebatkare û azadîxwazan bixin bin givaşê.

Riha vî şehîdê nû û hemû Şehîdên rêya azadiyê şad û rêya gihîştin bi armancên wan pir rêving be.

Partiya Demokrat a Kurdistanana Îranê
16.09.1382'ye Rojî
07.12.2003'ye Zayînî

Daxuyaniya Deftera Siyasî a PDK Îranê derheq hilbijartina gera 7'mîn a Meclîsa Şêwra Islamî

Hevwelatîyên birêz!

Xelkê azadîxwaze Kurdistanê!

Li gor ragehandina Wezareta Hundir ya Komara Islamî a Îranê, qirar e li destpêka meha Reşeme ya 1382'ê Rojî de, hilbijartina gera 7'ê a Meclîsa Şêwra Islamî bimeşe.

Li vê pêwendiyê de rayedarên derece bilinde rejîmê û zaf ji sazî û **dezgehên ne hilbijartî ên xwedî deshilat**, her yek bi terzekê ketine lezê bo vê çendê ku xelkekî zaftir bikêşne ser sindûqên deng danê, û ji aliyekî din ve e cêhdê dîkin ku kesên ser bi destê û girûpên wan bi xwe serî ji sendûqên den danê hilînin.

Bo hemû xelkê Îranê û bîr û raya giştîye derve re jî ron e ku hilbijartin li Komara Islamî de piştî rêve çûna yekem gera hilbijartinên Meclîsê ku li vir jî rê nehate dan ku nonerên xelkê Kurdistanê biçin bo Meclîsê, qet bi terzekî demokratîk û bi vî awayî ku li welatên demokratîk û pêşketî de rêve diçe, bi rêve neçûye.

Piştî hilbijartina Xatemiyyê bi nav Reformxwaz ku tevî Meclîseke ser bi Parêzvanan rû bi rû bû û hêceta wî bo pêngav nehilgirtina ber bi encam gihandina qenc û sozên xwe, karşikêniya Meclîsê, û netebahî a Meclîsê tev dezgeha "îcrayî" (kiryarî) bû, û xelkê Îranê û yek ji wan xelkê Kurdistanê bi germî li hilbijartinên gera 6'mîn a Meclîsa Şêwra Islamî de pişqdar bûn, da ku bi qewlê xwe deshilata yasa danîne jî bidin dest Reformxwazan û tu hêcetan nedin dest wan, da ku li ser qewl û sozên xwe rabiwestin.

PDK Îranê jî hingê daxwaz ji xelkê kir ku li hilbijartinê de pişqdar bin û dûr ji baskên nava deshilatê de, dengê xwe bidin wan nonerên ku ji wan re cihê bawerî û hitbarê ne. Li encama vê dîtingehê û gav hilgirtina xelkê li vê pêwendiyê de, Meclîsek hate hilbijartin ku 75 li sedê ye nonerên vê ser bi reformxwazan yan kesayetiyên serbixwe bûn.

Lê bi vî halî jî me dît ku ne Serok Komarê bi nav Reformxwaz û ne Meclîsa Reformxwazan çî karek bi qazancê guherînên baş û bi dest ve anîna aliyê kême xwastik û daxwazên xelkê ji destê wan nehat û evên li vê navberê de biryar dan û yasa danîn û bi rêve

birin, tenê kes û aliyên **ne yasayî** û **nehilbijartî** bûn. Her bo mînak guhê xwe nedane wan hemû lome û gazinde û hawara **Feraksyona Kurd** li derheq cinayetên rejîmê li bajarê Sine, Serdeşt, Mehabad û . . . hwd, û çî bersivek pê nehate dan. Ku wisan e dibe hemû aliyekê re, kifş û eyan bibe ku ev Meclîsa bi her pêkhatekê be û nonerên Meclîsê her kesane bin, her organ û kes û dem û dezgehên serweyî yasayê ne ku hukûmetê dîkin, her ev bi xwe biryaran didin û bi xwe jî wan biryaran rêve dibin. Lewma heq nine xelk bi berbijar bûnê yan bi pişqdarî kirin li vê hilbijartinê de rewşa û berheqî a bi derew ji Komara Islamî re çê bikin, baştir e lê bigerin da ku baskê Parêzvanan Meclîsê bi dengê hindî kêmtire dengdanan pêk bîne, da ku li ber çavê bîr û raya giştîye navxwe û derve sexmeratî pişqdarî a xelkê li hilbijartinê de singê xwe nede pêş. Her lewma çavniheriya me ji kesên xweşnav û kesayetiyên navdar ên nava civakê de ku xwediyê hitbar û kar tê kirina taybet bi xwe ne, eva ye ku bo berbijar bûnê nav nivîsiyê nekin û hitbara xwe li pêxema meremên rejîmê de gorî nekin. Li ser civatên xelkê Kurdistanê hewce ye ku bo ser sindûqên deng danê ne çin û li hilbijartinê de pişqdarî nekin û rê nedin ku Komara Islamî a Îranê ku li ber çavê bîr û nêrîna giştî henekên xwe li dengê wan û pişqdariya wan li hilbijartinê de biket.

Dibe eva jî bihê zanîn ku pişqdarî kirin li hilbijartinê de, heta eger bi dana dengê sipî û nivîsîna dirûşmên dijberî rejîmê jî be, dîsan jî hingê ev merema rejîmê ser digire, ku dixwaze ji rêya dezgehên propagandê ên xwe ve îdiaya vê hindê bike ku xelk dîsan piştgiriyê jê dîkin. Ku wisan e bila bi serwestiyeke zaftir ve rabûn û rûniştin tevî vê hilbijartinê bê kirin û bi pişqdarî ne kirina li hilbijartinê de, hem "**ne**"yeke din bi rejîmê li tewawetiya xwe de bê gotin û hem jî ji vê rêyê ve, vê walahiya mezin bêxne ber çavê bîr û raya giştîye cîhanê ku li navbera deshilata Komara Islamî û xelkê azadîxwaze Îranê bi giştî û xelkê Kurdistanê de bi taybetî, li rojevê de ye, û çûne jêr pirsyarê ye ne rewayî û



berheqî a rejîmê zaftir ji berê bê nîşan dan.

Deftera Siyasî ya Partiya Demokrat a Kurdistanana Îranê
25.09.1382'ye
16.12.2003'ye Zayînî

Şêwra Deshilatdar a Îraqê û der kirina Mucahidîn Xelkê Îranê

Roja çarşemî 19'ê Sermaweza sala 1382'ye Rojî hemberî 10.12.2003'ye Zayînî Şêwra Deshilatdar a Îraqê di daxuyaniyekê de da zanîn ku dê Rêxistina Mucahidîn Xelk li Îraqê der biket û dibe ev rêxistine heta dawîya meha December'ê li wî welatî de nemîne. Her wisan da zanîn ku kereseiyên wê rêxistinê vê ji bo tolhildana zirar û xisara wan kesên ku li rejîma berê ya Îraqê zîyanbar bibûn, dê bihêne destê ser kirin.

Ev biryara Şêwra Deshilatdar a Îraqê, dûr ji vê çendê ku helwesta Mucahidîn Xelk çawa bûye û çî qas cihê pejra me bûye, lê dîsan jî nabe bi hikmekî rewşa bihêdanî û di bin her navekê de bimeşe, pitir bi qazancê Komara Îslamî a Îranê tewaw bibe. Em hêvîdar in Şêwra Deshilatdar a Îraqê bi bêhnek firehtir û çavekî wekirîtir mêzeyî vê pirsê biket û rêyekî berheqtir û baştir di vê pêwendiyê de bigire pêşiya xwe.

Daxuyanî

Di 55'mîn salvegera derçûna daxuyaniya cîhanî a mafên Mirovan de gelê Kurd û xelkê Îranê daxwazkarê piştgiriya cîhanê ji maf û azadiyên xwe ne

Roja 14'ê Octebera îsal, Sekreterê Giştî yê PDK Îranê, li ser û bendê 7'mîn salvegera teslîm (bidestdana) kirina 6 kes ji xebatkarên Partî bi Komara Islâmî a Îranê ji aliyê Bizava Islâmî a Kurdistanê ve, nameyek ji bo birêz Kofi Enan Sekreterê Giştî yê Rêxistina Neteweyên Yekbûyî re şand. Hevalê xebatkar Ebdula Hesenzade ji bo Kofi Enan dabû xuya kirin ku rejîma Îranê di heyamê vî 7 salane de ji dan û belav kirina her cure zanyariyekê sexmeratî van azadîxwazên gelê Kurd xwe dût xistiye. Di vê nameyê de hatibû ku: Piştî borîna vê heyama dût û dirêj ji firotina 6 xebatkarên Partiya Demokrat bi Komara Islâmî, niha jî bo malbat, kes û kar û hevhişên van eyan nine ku ew zindî ne an hatine li dar vekirin, eger zindî ne di kîjan girtîgehê de ne û di çi rewşekê de dijn û çima rê nadin çi kes wan bibîne, ger ji yana wan hatiye standin, çawa û li ku derê hatine mehkeme kirin û li ku derê hatine veşartin? Lewma daxwaz ji birêz Kofi Enan hatibû kirin ku bandor û şiyana û karîna xwe û Rêxistina Neteweyên Yekbûyî ji bo eyan kirina çarenivîsa wan 6 endamên Partiya Demokrat bi kar bîne.

Piştî belav bûna vê nameyê hejmarek ji kesayetiyan siyasî û Parlamenter li Ustiraliya, Îngilistan, Swêd û çend Komele, navend û rêxistinên siyasî û mirovhezê Kurdan û nêzî bi hezar kes ji dilsoj û xemxurên Partiya Demokrat û tevgera Millî - Demokratîke gelê me li Kurdistan û dervey welat, bi awayên cur bi cur piştgiriya xwe ji vê daxwaza Sekreterê Giştî yê Partê ragihandin.

Weke zor carên din ku xebatkar û azadîxwazên Îranê, dengê zilm jêkirina xwe, hevhiş û hevvelatiyên xwe bi guhê Sekreterê Giştî û Rêxistina Neteweyên Yekbûyî gihandine û çavnihêrê ve bûne ku pêngavên micit bi merema daxwazên van bihê avêtin, lê bi encama dixwaze xwe negihîştine, mixabin daxwaza arîkariya Sekreterê Giştî yê Partiya me jî ji birêz Kofi Enan, bê bersiv ma ye. Bi kêm girtina dengê daxwaza xelkê Îranê û pêngavên ne avêtina bi bandor û erênî ji aliyê Rêxistina Neteweyên Yekbûyî ve derheq daxwaz û çavnihêriya Îraniyan ji vê Rêxistinê ve, bû sedema ve ku Komara Islâmî a Îranê bi rûyekî zêdetir û bê şermane dirêjî bi pêpes kirina maf û azadiyên xelkê Îranê û tepeser kirin û ji nav birina neyar û xebatkarên bide.

Li heyamê 2 mehên derbas bûn ji nivîsîna nameya Sekreterê Giştîyê Partiyê re rêzokek ji tawan û cinayetên din dijberî xelkê Kurdistanê û azadîxwazên gelê Kurd hatine meşandin ku hin ji van evane ne:

1. Di 16'ê Octebera 2003'ê Zayînî hemberî (24'ê Rezbera 1382'e Rojî) de, 3 ciwanên Kurd bi navên 1. Ehmed Zûdî kurê Mihemed Hesen, 2. Mensûr Merûfî kurê Mam Axa, 3. Azad Seîdî

kurê Mihemed li gundê Nelas (li herêma Serdeştê) ji aliyê hêzên leşkeriye rejîmê ve ketine ber êrişê û hatin kuştin.

2. Di 27'ê Octeberê (5'ê Xezelwer'a 1382) de mirovek zehmetkêş bi navê Hemze Mam Axa, xelkê gundê "Binuxelîfî" a Serdeştê kete ber êrişa hêzên leşkeriye Komara Islâmî û hate kuştin.

3. Di 4'ê Decembar'a 2003 (13'ê Sermawez'a 1382 Rojî) de 2 ciwanên din yê Serdeştê bi navên Ehmed Eşk Şîrîn û Elî kurê Resûl ji aliyê polîs û hêzên întizamiye Komara Islâmî ve jiyana xwe ji dest dan.

4. Roja 5'ê Decembar'a 2003 (14'ê Sermawez 1382) Celîl Zêweyî, xelkê Serdeştê û endamê Partiya Demokrat ku 7 sal bû di girtîgehê Komara Islâmî de êş û keser û îşkence didît û hikmê îdamê jê re hatibû dan, hate li dar vekirin.

5. Roja şemî 6'ê Decembara 2003 (15'ê Sermawez 1382 Rojî), Ramîn Şerîfî, xelkê Seqiz û endamê Partiya Demokrat ku heyamê 7 mehan berî niha hatibû girtin û bi îdamê hatibû mehkûm kirin, hate li dar vekirin.

Hejî gotinê ye ku navên van 2 kesên îdam kirî, berê tevî navên komek ji girtiyên siyasî yê din ku bi mirinê hatine mehkûm kirin, bi haya kom û komele û navendên berevanî kirin ji mafên mirovan gihîştibû û hatibû daxwaz kirin ku hemû cehd û hewla xwe bi kar bixin heta ku ji tirs û xofa îdamê ve bihên rizgar kirin. Lê wekî em dibînin mixabin cehd û xebitîna navneteweyî û mirovhezan bi vî qasî nebûn ku Komara Islâmî ji cî bi cî kirina cezayê diyarî kirî ji wan re, bihê zivirandin.

Ger li bajarekî biçûk û deverekî berteng mîna Serdeştê di heyamê kêmtir ji 2 mehan de 6 ciwanên bêguneh û zehmetkêşê Kurd, ji aliyê hêzên bi nav întizamî ve tên kuştin, li seranserê Kurdistanê Îranê hemû salekê bi dehan car ji aliyê hêzên leşkeriye ve rejîmê ve kemîn ji bo kasibkaran re tê danîn, teqe ji wan tê kirin û hejmarekî zêdetir ji vê tên kuştin û birîndar kirin.

Meşandina wan cinayet û tawanane li Kurdistanê, hevdem tevî kuştina xelkê bajarê "Serawan"ê ji aliyê hêzên tepeserkere Komara Islâmî û mil bi milê êrişa Hizbullahiyan bo ser kom, civîn û meşên xwendekaran û wan kesên ku lome û rexne ji pêpes kirina maf û azadiyên mirovan ji Komara Islâmî digirin, tiştêkî hev berwar nine.

Hiştina dadmendên goriye kuştinên rêzokî li girtîgehê de û pêşgirtin ji rêve çûna rê û resma bir anîna goriyan, lêkana civîna Xatûna Şîrîn Ebadî, wergirê Xelatê Nobel a Aştiya 2003'ê, li dar ve kirina girtiyên siyasî yê Kurdistanê û vekirî hêlana destê hêzên leşkerî ji rijandina xwîna xelkê li ser û bendê 10'ê Decembar (roja cîhanî a mafên mirovan) de, peyameke zor zelal û eşkere ji bo cîhanê têde ye. Ev peyame eva ye ku

Komara Islâmî li ser bin pê kirina maf û azadiyên mirovahiyê her wisan dê berdwam be û sedema ve berdwamiyê jî ji vê yekê çavkaniyê digire ku daxwazên Îraniyan hawar û gaziya zilm jê kirina wan bi destê rayedarên Komara Islâmî ji aliyê Rêxistina Neteweyên Yekbûyî û civatgeha cîhanî ve buha û giringiya pêdivî jê re nehateye dan. Ger rêveber û nonerên vê rejîmê derheq bi wan hemû zilm û cinayetane ku dijî hevvelatiyan kirine û dikin, di astê navneteweyî de bi awayekî yekdeng bihên şermezar kirin: Ger daxwaza dehan Partî, Rêxistin, civat, kom û Komele, saziyên siyasî, çandî û mirov dostên Îranî û bi milyonan hevvelatiyên piştîwanê wan, guh jê re bihê girtin û rayedarên Komara Islâmî bi encamderî sûc û cinayetan dijî mirovahiyê bihê nas kirin: Ger givaşekî navneteweyîyê bihêz bo ser vê rejîmê hebe: Bêşik nikare wiha bi eşkere û bê şermane mafên mirovan bin pê biket û sûc û cinayetan bidomîne.

Li roja 10'ê Decembar, roja cîhanî a mafê mirovan û 55 mîn salvegera derçûna daxuyaniya cîhanî a mafê mirovan de, bala mirovên demokrat û pêşkeftinxwaz bi giştî û Rêxistina Neteweyên Yekbûyî û komele û navendên navneteweyî yê aligirê maf û azadiyên mirovî bi taybet bo aliyê reftar û siyasetên dijî mirovî yê Komara Islâmî di Îran û Kurdistanê de radikêşin û radigehînin: Ger pêngavên pilez û bi bandor ji bo berband kirina hovatî û cinayet afirandina Komara Islâmî nehê avêtin, îdam kirina azadîxwazan, kuştina xelkê bi zal hatî û binpê kirina car tevî carê zêdetire maf û azadiyên mirovahiyê dê zaftir bibin.

Di vê demê de carekî din serexweşî û behîdarî û hevsoziya xwe bi malbat û xizm û kes û karên goriyên nû ye cinayetên Komara Islâmî li Kurdistanê û parên dine Îranê radigehînin û ceħda bê encame ve rijîmê ji bo têk şikandina îradeya şoreşvaniya Îraniyan ji bo dawî anîn bi dîktatorî û zordestiyê, bi tundî şermezar dikin. Her di vê demê de jî daxwaz dikin ku nûtirîn tawan û cinayetên Komara Islâmî ji aliyê û hevdem bûna van bûyerane tevî 55'mîn salvegera derçûna daxuyaniya cîhanî a mafê mirovan û dana Xelatê Nobel a Aştiyê bi Xatûna Şîrîn Ebadî, bibe handerek ji boyê ve ku Rêxistina Neteweyên Yekbûyî û kom û komeleyên navneteweyî bi giştî, bi helwestên xwe li hemberî Komara Islâmî de çavnihêriyê bikin û li hemberî wan hemû êriş ku bi eşkere ji aliyê vê rijîmê ve bo ser maf û azadiyên Îraniyan ve tê kirin, biryarekî berpirsyanane û netirsane bidin.

Deftera Siyasî ya Partiya Demokrat a Kurdistanê Îranê
10'ê Decembar' 2003'ye Zayînî
19'ê Sermawez'a 1382'ye Rojî

Îdam û teror nikare tevgera Kurdistanê rawestîne

✎: Bavê Nûjîn

Xwendevanên hêja, her weke çend rojan berî niha li daxuyaniya PDK Îranê de hate belav kirin, careke din maşîna teror û îdama rejîma cinayetkar, hov û mirovkuje Komara Islami kete rê û bi keser û kovaneke zaf, vê carê jî di girtîgehê de canê 2 şoreşvan û xurtên gernase Partiya Demokrat a Kurdistanê Îranê bi navên **Ramîn Şerîfî** û **Celîl Zêweyî** ji wan standin û wan şehîdan bi xwîna sore xwe rûpelên berxwedanî û xebat bo bi dest ve anîna azadî û mafê çarenivîs û qedera gelê Kurd di Kurdistanê Îranê de mohir kirin. Rejîma kevneparêze Komara Islami jî bi vê cinayetê, lekeyek reşe din bi karnama tijî ji cinayet û hovîtiya xwe zêde kir.

Wek tê zanîn yek ji xasmaniyên rijîmên dîktator û serberdayî, evaye ku bo man li ser kursiya deshilatê, xwe ji çî kiryar û cinayetek hovane neparêzin û ne tenê çî maf û azadiyekê bo civakê berçav nagirin, belkî gelek hovane dengê azadîxwazan tepeser dikin û girtîgehên xwe jî azadîxwazan tijî dikin û bersiva hemû dengeke lome û gazindan bi çek û xwîn rêtinê didin.

Li serdemê îro de ku piraniya welatên cîhanê cezayê li dar ve kirinê di qanûn û destûrên bîngêhîne xwe de hildigirin, yan jî na meşînin û hemû salê bi qasa van welatane zêde dibe, lê mixabin hêjî li cîhanê û nemaze di Rojhilata Navîn de hin rejîmên dîktator hene ku ne tenê çî hurmetekê bo maf û azadiyên mirovî

nadanên, belkî canê mirovan ji cem van çî buha û girîngiyek nine. Yek ji van rijîmên ku heta niha jî li gor qanûn û yasayên Sedsalên Navîn dimeşe û binêşe û bîngêha wê li ser cinayet û teror û kuştin û . . . hatiye ava kirin, rejîma kevneparperwera Komara Islami a Îranê ye ku çî gav û demekê qanûn û rewşt û edetên navneteweyî berçav negirtiye û hemû salê bi dehan caran bi sedema bin pê kirina mafên mirovan û qanûnên navneteweyî ji aliyê Komele û Rêxistinên mafên mirovan û sazîyên din ên wî warî tê mehkûm kirin û berdewam tevî pêlên gazîde û lomeyên navxweyî û derwekî berhîngar e.

Hewceye bihê gotin ku eva ne destpêk û ne jî dawîya cinayetên Komara Islami dibin. Heke em rûpelên dîroka cinayetên Komara Islami a Îranê hilbidin, bi êşkera bo me derkikeve holê ku wan cinayet û xwînmijiyên temenek 25 salî hene û Her di destpêka hatine ser şola vê rejîmê ku ji aliyê Melayên kevneparperwer û li serweyî hemûyan Xumeynî ve bersiva daxwaz û xwestikên gelê Kurd bi agir û asin hate dan û ferman û "fitwa"ya **Xezayî**ê di dijî wî gelê bindeste Kurd îlan kir û daxwazkarên vê biheştê ku Xumeynî soz dabû wan, bo aliyê Kurdistanê ketin rê û xwe ji çî cinayet û kiryarekî mirar ne parastin û bajarên Kurdistanê bi xwîna xebatkar û şoreşvan û xelkê bê gune û sivil sor kirin, Gundên Kurdistanê kavi û wêran kirin, çale reşên xwe ji keç û

xurtên Kurd tijî kirin û qenare û meydanên îdam û li dar ve kirinê bi rêxistin û bi hezaran girtiyên siyasî, xebatkarên Kurd, di dadgehên maşkanê û çend demî de bi mirinê mehkûm kirin û di bersiva vê çendê ku renga evane sûçdar nebin! Digotin: **Heke bê sûç û bê gune bin vê biçne biheştê! Heke ne, gihîştine cezayê xwe!** Rejîmê ev siyasîyê dijî mirovî û hov tenê bi wê çendê kuta nekirin, belkî destên mirar û pîse terorîstên (bi nav dîplomata)!!! Komara Islami gihîştine welatên biyanî û bi sedan azadîxwazên welatê me, weke Dr. Qasimlo û Dr. Sadiq Şerefkendî û sedan kesên din şehîd kirin.

Her çend rejîma Melayan karî hetanî qasekê xebata mafxwazane gelên Îranê weke: Ereba, Tirkman û Belûç tepeser biket, lê bi xweşî ve Kurdistan her mîna berê qurs û mikûm bi pêşengiya Partiya Demokrat di hemberî dijminan de sekiniye û bûye çepera berxwedanî û berevanî ji azadî û demokrasî û mafê neteweyî.

Her wekî Rijîma Paşatîyê nekarî bi îdam kirina serokê Komara Demokratîke Kurdistanê, Qazî Mihemd û hevalên wî dawî bi xebata azadîxwazîye gelê Kurd bîne, Komara Islami jî bi wan hemû kiryarên hov û nemirovane xwe nikare xebat bo gihîştin bi serbestiyê rawestîne û wekî gotine: **Tobeya Gur mirin e.** Heta rojekê ku ev rijîme li ser deshilatê be, cinayet, teror, îdam, dizî, pisî (fisad) û bêkarî, û zaf pirsgirêkên siyasî, aborî, civakî û çandî vê her dem hebin û xelkê welatê me bi gîştî û gelê Kurd bi xasmanî, roja xweş nabînin. Rêya herî baş bo dawî anîn bi wan hemû rojreşî û bêbextiyane hîloşandin û nehêlana vê rijîma mirov kuj e.

Sipas û pêzanîn

Piştî weşandina yekem hejmara rojnameya **Agirî**, ku tevî pêşwazîyeke germ û berbiçave rewşenbîr û welatparêzên Kurd rû bi rû bû, ji aliyê hejmareke zaf ji xwendevanên **Agirî** û bi xasmanî edîb, nivîskar, zimanzanên dilsoje gelê Kurd û her wiha endamên xebatkare PDK Îranê ve, pêla pîrozbaiyan bi rêyên cur bi cur ve gihîştine destê me. Her wiha çendîn malper û weşanên Kurmancî jî li dane nasandina **Agirî** de rolekî erênî nîşan dan.

Hewceyî gotinê ye ku naweroka wan hemû pîrozbahiyanê cuda ji eyan kirina seh û ogirya pak û dilsojane ye wan rêzdarane, gelek pêşniyaz û nêrînên buhagiran jî xistin ber çavên me, ku bê guman vê bandorek mezin li ser ziman û naveroka **Agirî** hebin û her li vê demê vê hêz û îradeya xebatkar û nivîskarên **Agirî** jî bi qawettir û mikumtir bikin.

Lewma bi navê rêveberên **Agirî** ve sipas û pêzanîna xwe pêşkêşî hemû wan kes û aliyan dikin ku tevî pîrozbaiyan, haziriya xwe ji bona arîkarî tevî **Agirî** bi me ragehandine.

Tevî hurmetan,

Desteya Nivîskarên Rojnameya **Agirî**

Li derweyî welat arîkariyên maliye xwe bo Partiya Demokrat a Kurdistanê Îranê bidne wê hesaba bankî:

C.C.P PARIS 68040
M020
FRANCE

Fîşeya Bankiye vê jî bo vê adresê Poste bikin:

A.F.K.B.P.102 75623
PARIS CEDEX 13
FRANCE

Hejmar Telefon û Fax a têkilî kirin bi Radyo Dengê Kurdistanê Îranê re:

Telefon: 00871762280073

Fax: 00871762280074

Cejna ji dayîk bûna Pêşmergeên Kurdistanê pîroz be

Sitavk82@yahoo.com



Desteyek ji Pêşmerg'an li ser Gera Mame Şêx li Mirgewer a Urmiyê

Di nava her neteweyeke xebatkar de ku paşî berhingarî û berxwedanî û can gorî kirina xwe karîna nîrê zordariyê bişkênin û bi wemalîna sibera reşe dîktatoriye, azadî û qedera xwe bi destve binin, hejmarek xortên vê neteweya xebatkar ku di refa herî pêşîne egîdî û mîrxasiyê de rolê erênî û qedersaz hebûne, navê wan di dîroka vî neteweyî de bi qedr û qîmeteke mezin ve tê tomar kirin û dibne ji bir nekiriye dîroka vî neteweyî.

Neteweya Kurd jî yek ji wan gelên cîhanê ye ku bi dirêjahiya zêdetir ji niv sedsal e ku bi awayekî rêxistinî bo gihîştin bi azadî û rizgar bûn ji bindestî û koletiyê xebatê diket û bi vê xebata domdare xwe ji serkeftinê nêzîk bûye. Bê guman her dekmekê ku basa vê tevgera Kurdistanê bête holê û em di nava wan hemû qehremanetî û cangoriyê ku gelê Kurd ji xwe nişan daye, xwe gorî û mîrxasê herî rastîn û jêhatî hilbijêrin, ev egîde cuda ji Pêşmerge ku mîrxas û cangoriyê hemû oxirmeyên giran û berxwedanvanê wan hemû qonaxên dijware xebatê bûye, nikare kesek din be. Niha êdî kêma kes hene ku nezaniya pêşveçûna Şoreşa Kurdistanê heta çî qasekê berê ked û xwe gorî kirina **Pêşmerg'an** e.

Dîroka navê Pêşmerge vedigere bo dema ava bûna Komara Demokratîke Kurdistanê di sala 1945'ê li bajaê Mehabadê de ku şiwirmendên vê komarê çekdarê Kurd bi Pêşmergeê Kurdistanê navdêr kirin û paşê ji aliyê Partiya Demokrat a Kurdistanana Îranê ve roja 26'ê Sermawez'ê ku roja dawî anîn bi temenê dîktatoriya rejîma Paşatiyê di sala 1945'ê li bajarê Mehabadê ji aliyê çekdarên Kurdan ve bû, wek roja ji dayîk bûna Pêşmergeên Kurdistanê bingeh hate girtin. Ji vê demê ve hetanî niha

Pêşmerge wekî xwestiviyê gel û remz û sembola rizxgarîxwazî û armancên berheqe mirovahiyê hatiye nasîn.

Wekî em dizanin bi dirêjahiya dîrokê dijminên gelê Kurd ne ku her ne xwestine daxwaz û pîrgirêkên Kurdan bi rêya aşîxwaziyê çareser bikin, belkî her tim di hewldanê de bûne ku bi rêya serkût û tepeser kirin, kuştin û webirandin, mişextî kirin û gelek rêyên din ên nemirovane weke hepsî kirina rewşenbîran û sivikatî û înkâr kirina ziman û çanda gel, xwestine tovê Kurdan bibirînin û pênasana neteweya Kurd ji holê ra bikin.

Bi sedema wan kiryarên hovaneye dijminan bûye ku hêza berevankare gel (Pêşmerge) neçar bû ku bi xebata çekdarî li hemberî hovîtî û destrêjiyên dagîrkeran raweste û di pêxema qezenc û berjewendiyên neteweya Kurd de bi hezaran şehîd pêşkêşî baregeha azadiyê biket.

Ev berevaniya hêza Pêşmerge ne ku her nehêlaye pîlanên dijminan ser bigre û seha neteweyîye Kurdan biçilmis e, belkî kariye roj bi rojê evê seha neteweyî di hundirê kit kitê welatparêzên Kurd de xurttir biket. Lewma niha navê Pêşmerge li hemû perçeyên Kurdistanê da û di nav dilê hemû Kurdeke welatparêz de wek naveke pîroz cihê xwe girtiye û zêdebarî ceħda dijminan ku dixebitin xelkê Pêşmerge di asta navneteweyî û di nava Kurdan de bi peyvên kirête wek: Rêgir, dijî şoreş, têkder û . . . bi nav bikin û li berçavên xelkê reş biket. Lê bi egera wan kiryar û rêbazên berheq û miroviye Pêşmergeyên Kurdistanê ne her ev pîlanên dijminan ser negirtin, belkî bi korahiya çavê neyaran navê pêşmerge bûye wate û sembola azadîxwazî û rizgarî û hêviya gelê belengaze Kurd li her

aliyeke Kurdistan û cîhanê de.

Ku wisan e eger hêza Pêşmerge kariye heta niha di qonaxên herî dijwar de bi xebata çekdarî û cangoriya bê mînake xwe, berevaniyê ji gel û welat biket, di dema îro de bi berçav girtina rewş û kawdana siyasiye dever û cîhanê hewceye rewşenbîr û hemû welatparêzeke Kurd vê berpirsariyê bihagiran bigrin stûyê xwe û di warên cur bi cur de bixebitin, da ku bikarin hindî zêdetir gelê Kurd bi mafên rewa û zewt kiriye xwe şareza bikin û bi vê zane bûnê xebata azadîxwaziyê berfirehtir û hêviya serkeftinê nêzîktir bikin.

Maye bêjîn bila 26'ê Sermawez'ê roja bîr anîn û rûmet girtin ji xebat û canfidiyê kirina xebatkarên Kurdistanê ji hemû gelê Kurd pîroz be.

Ava bûna Partiyek nû ji bo Kurdistan a Îranê

Nêzî mehekê berî niha hinek dezgehên ragehandinê li rêya çend weşanan nûçeya ava bûna partiyek bi navê **Partiya Jiyana Azad a Kurdistanê** bo Kurdistanana Îranê weşandin.

Ava bûna her Partî û Rêxistinekê bo hemû evên ku bawerî bi demokrasî û piloralîzmê hebin tişteke xwezayîye û heta cihê pêşwazî kirinê ye jî, lê ev yêke ku partiyek yan rêxistinek li derve ra bo gihîştin bi hindêk meremên taybetiyên berteng, ew jî ne bo vec û berjiwendiya kurd, belkî li dirêjîya dijberî û dest têverdana aliyek derekî li kar û barên perçeyên din ên Kurdistanê de ava bibe, nikare cihê bawerî û pirsîyarê nebe.

Hem li belavokên ava bûna vê partiyê û hem li hinek nişaneyên din xuya dibê ku ev partiye dest çê kiriye P.K.K'ê ya (pêşîne) û her wiha nusxeyeke li siyasetên vê rêxistinê ku heyam bi heyam bi navên cuda cuda bo Kurdistanana Îranê dinivîsîne. Em bixwazin yan nexwazin Kurdistan hatiye par ve kirin û Kurden her perçeyeke Kurdistanê li têkoşîn û xebata xwe bo gihîştin bi mafê neteweyî û azadiyên xwe berpirsyar in û terzê xebat û rewşa hundirîya her yek ji wan welatan ku Kurdistan di navbera wan de hatiye par ve kirin, tevî hev cudan e. Ji ber vê çendê partiyek wisan dest çêkirî tenê di heyamkurt de vê bikaribe xebatê bidomîne û hejmarek kêma ji kesên ne şareza bo aliyê xwe rabikêşe, lê belê tu caran nikare bo heyamek dirêj dewamê bi temenê xwe bidet û xelkek berçav li devra xwe kom biket.

Bêşik civatên xelkê Kurdistanê bi giştî û rewşenbîr û ciwan bi taybetî, vê bi çavekî vekirî mîzêyî çawaniya pêk hatin û merem li ava kirina partiyek wiha biken û di vê derheqê de vê nêrîn û helwesta xwe hebin.

Hevdîtinên Sekreterê Giştiye Partiyê li Norwêjê

Erd hejê dîsan bûyerek mezine mirovî afirand

Roja pêncsemî 18'ê Decembar'a 2003'e Zayînî hemberî 27'ê Sermawez'a 1382'e Rojî hevalê xebatkar Ebdula Hesenzade Sekreterê Giştiye PDK Îranê seredana Parlemana Norwêjê kir û ji aliyê birêz "Turbiyun Yagland" serokê Komîsyona derve ye Parlemanê ve hate pêşwazî kirin.

Hejî gotinê ye birêz Yagiland Serok Wezîrê berê ye welatê Norwêjê bû û kesayetiyê navdare navneteweyî û serokê Komîteya Rojhilata Navîn di Entirnasyonala Sosyalîst de ye. Di destpêka vê hevdîtinê de bûyerên vê dawiyê yên deverê, Îranê, Kurd bi giştî û bitaybetî Kurdîstana Îranê ketin ber bas û guhertina hizr û ramanan. Û her du aliyên ramanên xwe di vê derheqê de beyan kirin. Piştî bas li ser têkiliyên du alî yên navbera PDK Îranê û Entirnasyonala Sosyalîst hate kirin.

Piştî vê hevdîtinê birêz Sekreterê Giştiye Partiyê seredana navenda Radiyo û Televîzyon a Norwêjê kir û tevî nûçegihanê ve saziyê Xatûna "Karî Girtine Elside" got û bêt kir.

Piştî nîvro ya vê rojê birêz Sekreterê Giştiye Partiyê bo careke din seredana Parlemana Norwêjê kir û tevî



Xatûna "Ugutwale" ji Partiya Sosyalîst a çep hevdîtin û hevpeyvîn kir.

Xatûna "wale" xîmdanerê girûpa karê Kurdan li Parlemana Norwêjê û serokê Komîteya Lêkolîn di Parlemana wî welatî de ye. Pêştir Partiya Sosyalîst daxwaz ji PDK Îranê kiribû ku têdîtinên xwe li hemberî bûyerên hundirê Îran û Kurdistanê bide nas kirin, ji bo vê yekê ku Partiya Sosyalîst bi baldan bi wan têdîtinane helwestên xwe diyar bike. Lewma vê hevdîtinê bihagiranî û girîngiyekî xasmanî ji bo her du aliyên hebû.

Li kiryarek terorîstî li Hewlêrê, 4 kes kuştî û 101 jî Birîndar

Demji mêrî 11:50 pênşnîvro 24'ê Decembar' a 2003



(4'ê Befranbara 1382'ye Rojî), terorîstekê bi tirimbêleka bombrêjkirî li ber deriyê Wezareta Navxwe ya hukûmeta herêma Kurdistan li Hewlêrê, xwe bi tirimbêlê ve teqand.

Li encama vê teqînê de, bilî kuştî û birîndaran avahiyê wezaretê û gelek xanî û avahiyên din jî ziyaneke madî dîtin.

Li teqîna han de keçek (13) salî û şofêreke Taksiyê û du pólîsên Wezareta Navxwe hatine kuştin û 101 kes jî Birîndar bûn, ku piraniya wan xelkê sivil û jin û zarok in.

Li gor rojnameya XEBAT Organa Partiya Demokrat a Kurdistanê, curê vê tirimbêla bomberêjkirî Pîkap TOYOTA bûye û nêzî 150 Kg TNT tê de teqiyaye.

Terorîzma Komara Islamî li Îraqê dixebite

Li gor wan nûçeyên ku piştî hiloşîna rejîma Bees ya Îraqê, ji aliyê çavkaniyên bîyanî ve tîn ragehandin, eyan dibe ku rejîma Komara Islamî a Îranê bi merema aloz kirina rewşa tenahî û asteng çê kirin li ser rêya ava bûna rejîmekî demokratîk û Federal li Îraqê, xwe ji çî kiryar û destêverdanekê na parêze. Bo çî bi çî kirina vê meremê li rêya Balyozxaneyên xwe ve her hêsan kariyekê bo çê kirina paseportan ji bo wan terorîstên ku bo Îraqê têne şandin çî bi çî diket. Cuda li vî karê han, rejîma Îranê li dirêjiya sînorên navbera xwe û Îraqê, bi awayên cur bi cur terorîstan dişîne hundirê Îraqê.

Di vê pêwendiyê de li gorî çavkaniya **Firans Pirês:** berpirsyareke leşkeriyê Emerîka ragehandiyê ku hejmara wan terorîstên bîyanî ku di nav Îraqê de hatine girtin, hetanî niha xwe gihandiyê sedan kesan û di nav wan terorîstane de 70 kes Îranî bûne.

Demjimêr 5:28 deqîqên berespêdehiya roja Înê, 5ê Befranbara 1382'ê Rojî, 26.12.2003'ye Zayînî, erd hejek ku rijdiya vê 6/3 pileyên rîşterê bû, bajarê **Bem** li parêzgeha Kirman ya Îranê hejand. Rijdiya erdhejê û darizîbûna xaniyan di hember erdhejê da, bûne sedemê ve yekê ku ev bûyera xwezayî ziyaneke mezine canî lê derkewe. Li gorî nûçe û raporan, bi hezaran kes hatine kuştin û dehan hezar kes jî birîndar bûne. Xelkekî zaf di bin dar û berên xaniyên herifî da mane. Li gor texmînan, renga hejmara goriyan xwe li hejmarek zaf zêdetir bidet. Cuda ji wan hemû kuştî û birîndaran, 60 ji 100'ê ye bajêr wêran bûye û ev xelkê ku ji vê qewimînê de, bi birîndarî yan bi silametî rizgar bûne, di vê sir û seqema zistanê de bê mal û hal û ser pena ne.

Ger em bala xwe bidin vê rastiyê ku li welatên pêşkevî erd hejên wêne bi qawettir, ziyana canî û maliye gelek ji wêne kêmtir lê ketiye, bo me der dikewe holê ku sedema despêkiye bûyera qir bûnê, dizivire bo bêpariya xelkê Îranê li wan xaniyên ku bi terzeke zanistî hatibin ava kirin û xweragir bin. Ji wêne jî taltir eva hane ku dezgehên dewlwtî ên Komara Islamî bi sebebên cur bi cur, wekî zor bûna navendên biryar danê, berfireh bûn û fesad û genîtiya malî di sîstema deshilatdariyê de û biyanî bûna para zore berpisyar û rayedaran tevî xelkê, li dema rûdana wan cure qewimînan da, bi wî awayê ku hewce ye, karê hawarê de çûna lêqewimiya li dest nahêt û li encamê de, hijmara goriyan zêde dibin.

Partiya Demokrat a Kurdistanê Îranê, derheqî wê bûyera dilêş, hevderdiya kûre xwe ji bi çî mayî û kes û karên goriyan, xelkê bajarê Bem'ê û gişt xelkê Îranê radigehîne û di behî û kovana wan de xwe bi şîrîk dizane. Partiya Demokrat tevî serexweşî li malbat û çî mayî yên goriyan, qenc bûna her çî zûtire nexweş û birîndaran bi hêvî dixwazin.

Her li vê demê de ji xelkê Kurdistan û Îranê dixwaze bo hawarê de çûna lêqewimiyan, ji çî cure arîkaiyekê xwe neparêzin û daxwazê ji wan diket ku li rêya noner û bavirpêkiriye xwe ve rêxistin û saziyên bavir pê kirî û ne dewletî, li zibara hawarêde çûna xelkê bajarê Bem û di pêvajoya zivirandina wan bo ser jiyaneke normal, çelengane pişikdariyê bikin.

Bo dewlet û navend û saziyên navneteweyî bi erk dizanîn, bi lez milê xîretê jê vemalin û hewara xelkê erd hej lêdayiye bajarê Bem'ê de herin.

Bi hêviya hevpişkiya çelengane û erênîya xelkê Îran û civatgeha cîhanê bo hawarêdeçona erd hej lêdayiye bajarê Bem û ava kirina jiyana dubareye wan.

Deftera Siyaz a Partiya Demokrat a Kurdistanê Îranê
5 Befranbara 1382'ê Rojî,
26.12.2003'ê Zayînî

Bêkarî giraniyek mezin û çekek herifîner di hemberî civaka Îranê

kurmanchakki@yahoo.com

Dewleta Komara Islamî a Îranê di mehên derbazbûyî de ragehand, nirxa bêkariyê li Îranê di midehê 2 sal û nivên derbazbûyî de 2/8% hatiye xwar. Wezîrê Karê Komara Islamî, Sefder Husêynî di ragehandina xwe de li rêya televîzyonê da zanîn ku nirxê bêkariyê li Îranê de li sala 1379 (2000) bo dawîya sala 1382 (2002) li 14% gihîştîye 11/2%ê.

Li gor serhijmêriyên (amar) fermiye Komara Islamî, nirxê bêkariyê li salên 1379, 1380 û 1381 bi wî awayî bûye: 14/25, 14/2 û 12/8%.

Di gel wê ku Komara Islamî basa kêma bûna hejmarê bêkara dike serhijmêriyên fermî wiha nîşan didin ku di Îranê de bi awayek fermî 2 milyon û 500000 kes bêkar in. Ewa di halekê de ye ku nirxê bêkariyê di Îranê de gelek ji wê yekê zêdetire û Komara Islamî tenê wan kesan hesab dike, ewên ku li deftera îdareya kar de navên xwe nivîsandine.

Di programa dewleta Xatemi da hatiye ku hersal diviya aliye kêma 760 hezar kes firseta kar bo bêta dan. Dihalêke de di 3 salên derbazbûyê de li ser yek 1 milyon û 614 hezar kesan karîne bikevin bazara kar.

Sala derbaz bûyî dewleta Xatemi bi pilana "zerbetî" û bi bodceyek 900 milyar Tûmenî karî bo 300 hezar kesan îmkanên kar kirinê pêk bîne.

Arîşa bêkariyê

Gelo tu bêjî dewleta komara Islamî hemû ewa ku di şiyana wê de ye bikar bîne bo ji nav birina nexweşiya bêkariyê li civaka Îranê de, yan hinek armancên din pişt wê meselê hatine nivistin ku civaka Îranê û xasmayî Kurdistanî jê agahdar nînin?

Bas kirina derheq siyaseta bêkariyê li ser û bendên hilibijartina meclîsa 7. ya Komara Islamî bo mirov wê pirsyarê tîne holê, gelo birastî Komara Islamî girifta bêkariyê wek pirsgirêkek mezine civakî mêze dike, yan kar bidestên rejîmê dixwazin bi wî awayî bala û sirinca xelkê Îranê li meselên bingehîne civaka Îranê, Yanî nebûna **sîstemek demokratîk** û **edaleta civakî** dûr bikin. Bê bersiv xuya ye ku rayedarên Komara Islamî 25 salan dem hebûn hetanî bikaribin vê pirsgirêka mezine civakî çareser bikin û nebin sebebê wê yekê ku zêdetir ji nivîya xelkê Îranê di felaketa aborî de bijin.

Bo me siruştîye ku em wek Partiya Demokrat a Kurdistanê Îranê li ser mesela bêkariyê û vê pirsgirêkê li mêzegehek netewî û her wisa li mêzegeha partiyekê ku di piraktîka siyasîye xwe de armanca xwe ya yekem pêk anîna civakek adilane daniye, bisekinin. Di rastîyê de peyvî li ser pirsgirêka bêkarî û giriftên aborî ji bo me mîna peyvî li ser pirsgirêka neteweyî ji bo neteweya Kurd li Îranê de giring û kilîliye. Diber ku giraniya

bêkariyê li Kurdistanê Îranê xasmayî bi awayeke berfireh ketiye ser istûyê gelê Kurd û pêşiya pêşveçona xelkê Kurdistanê li bin wê giraniyê de hatiye girtin.

Her wekî gelek karnasên aborî dibêjin, merema Komara Islamî ewa nine ku bêkariyê weke pirsgirêkek bingehîn çaresere bike, lê dixwaze dem bi dem weke merhemek bo ser birnan, bo kêma kirina êşa wê bikar bîne û bi wî awayî him xelkê zêdetir bi xwe mijûl bike û him jî armanca Xameneyî ko bas kirin li giriftên aboriye "mustezefan" giringtir li azadiyên demokratîke wê bi cih bînin.

Xatemi bo dewra duyeme Serok Komariya xwe û ji bo çareser kirina pirsgirêkên aboriye civakên Îranê basa ramyara bêkariyê dikir. Bi wê manayê ku dewleta Komara Islamî dixwaze li hemû potensiyalên karkirina civaka Îranî behrê wergire û şiyana mirovên xwedî pispor bibe ser û pêşiya helatina mêjiyan li Îranê bigre.



Nerazî bûna karkeran li Îranê

Ew dirûşma han bi ciwanî mirov dikaribe bi mêzekirin bi armancên tenê ser kaxezê hatî nivîsandiye rêberên Komara Islamî bibîne. Girifta mezine hukûmata Îranê nebûna pirogramek karnasane û ewrojiye ji bo geşe kirina rewşa aboriye welat û pêkanîna hel û mercên wilo ku beşa taybetî bikaribe bi azadî û bêy tirsê pêşerojê bingehên xwe bihêz bike.

Vêgavê nifûsa Îranê xwe digehîne 66 milyon kesan û bi gor statîkên fermiye komara Islamiye Îranê ji her 3 kes Îraniya kesek li temenê 15 - 29 salî de ye. Wateya wê ewa ku hersal 700 hezar kes bi wan kesên ku hewceyî bi kar hene zêde dibin û li hember de şiyana Îranê di çarçeweya wê Komara Islamî de bo bersivdan bi hewcehiya bazara bêkara roj bi roj kêma dibe. Di rewşeka herî îdeal de Komara Islamî wê bikare salê tenê bo 700000 kesan

firseta kar pêk bîne, bi wî awayî civaka Îranê wê dîsan ji bin giraniya 2,5 milyon bêkara binale û civaka Îranê diviya çavnihêra nexweşiyên civakiye din jî bibe.

Li Kurdistanê ev arîşe hîna girantr e

Amarên fermiye Îranê bi giştî dixwazin derd û elemên civakên Iranê kêma nîşan bide. Li Kurdistanê ku li dema hatine serkara Komara Islamî hetanî îro li ambargoya aborî de bûye û rewş wê li gişt Îranê xerabtire. Bêkariyê piraniya malbatên Kurd kirine qurbanîyê xwe. Ciwanên Kurd jî bo bi dest anîna kar û jiyandina malbatên xwe naçarî Kurdistanê ber bi başûr yan navenda Îranê bi cî bihêlin. Diber nebûna xizmetên giştî pisporên Kurd nikaribin li Kurdistanê karê xwe dom bikin û di encamde bajarên mezne navend û başûr û ser bajarê Îranê dibe navenda kar kirina pisporên Kurd.

Rewşa han wek encama siyaseta sîstematikey Komara Islamiye Îranê di hemberî xelkê Kurd, bûye sebebê birîndar tîr bûn û nasiktir bûna civaka Kurdistanê di hember gelek nexweşiyên civakî de. Bi giştî arîşeyên weke:

- * Nirxa bilinde bêkariyê
- * Nebûna îmkana kar kirinê li Kurdistanê
- * Siyaseta ramyariye Komara Islamî li Kurdistanê de
- * Ji nav birina îmkanê geşe kirin,
- * Xwe bi kar xistin
- * Pêk ne anîna navendên aborî li Kurdistanê

lewma sedema wê yekê gelê Kurd li Kurdistanê Îranê bibe qurbanîyê şerê aboriye wê rejîmê. Civaka Kurdistanê di hember wê siyaseta Komara Islamî de gihîştîye asteke gelek nexweş û birînen kûre civakî di nav xelkê Kurd de roj bi roj zêdetir dibin.

Hemî ew derdên hatin bas kirin beşek biçûk ji wan giriftaneyê ku rejîma Komara Islamî bo xelkê Îranê û gelê Kurd bi taybetî pêk anîye. Di hember wê rewşê de hêz û bizavên di saheya Kurdistanê de diviya bi awayek berfireh polîtîkek çalake aborî ji bo wekirina rêyekê bo derbaz bûn ji wê tengasiyê bikin armanca xwe û wê armancê bikin dirûşmên xwe yê siyasîye ser û bendên hilibijartina meclîsa 7. û bi wî awayî baykot kirinek çalakane wek altirnatîvek bo bilind kirina xwestên neteweyî û aborî vê bikaribe pilanên Komara Islamî bike bilqên ser avê.

Ji rojevîrîn xwestê xelkê Kurdistanê: 1. Pêk anîna xizmetên çalak kirina bazirganî û wekirina nawendên nûye aborî, 2. Pêk anîna xizmetguzarî ji bo wan malbat û kesên ku nikaribin bi hêasanî bikewin nav bazara kar de, 3. Rakirina ambargoya aborî li ser Kurdistanê Îranê û bikar anîna siyaseta aboriye ewroji ku tede xelkê Kurdistanê bi xwe li pilandanî û geşekirina aboriya welatê xwe de beşdar bin, vê bikare destpêkek nûjen bît ji bo derman kirina birînen kûre aboriya civaka Kurdistanê.

Xuyaye ku Komara Islam ne şiyana wê yekê heye û ne viyana wê.

Ciwanên Kurd li bin sîbera Komara Islamî a Îranê

✍️: Selîm Zencîrî

Her civakek ji çend qatên cur bi cur pêk tê û em dikarin bêjin çalaktirîn, bi bizavtirîn û berfirehtirîn qat di her civakê de qata ciwana ye. Ji ber ku ciwan in ku dikarin bi navê pêşerojê bipeyvin û di hemû beyavan de guhertinan pêk binin.

Eyan e dema ku çî zêrevanî an perwerdeya pêwîst ji bo ciwanan nehê kirin û pêdiviyên serdem ji wan re nehên misoger kirin ku di pêşvebirina civakê de rolê herî serekî bilîzin, di encam de qatekî bê bandor u nexweş jê der dikeve û dibe sedema wê çendê ku bandor û rengvedanekî xirab li ser civakê hebe.

Berevajî wê çendê jî dema ku di civakê de hemû îmkanat û fakterên alîkar ji bo ciwanan bêne berhev kirin, bê şik ev civake ji hemû alîyan ve dê pêşkevîtiyê bi xwe bibîne. Lewma girîngîdan bi qata ciwan, pûte dan e bi pêşeroja civakê.

Lê bi dirêjahîya dîrokê xuya dibe ku ciwanên kurd pitir ji her qatekî din yê civakê tûşê girêpêçk û asteng û zilm û zorîyê bûne û herwiha ji aliyê dagirkerên Kurdistanê ve hatine heps kirin, îşkencedan û berevrûyê îdam kirinê bûne, an jî bi neçarî ji welat hatine dûr xistin, ji ber wê ku seha neteweyî û berxwedaniyê di nava wan de bihê lawaz kirin. Her li ser vê bingehê rewşa ciwanên kurd li Rojhilatê Kurdistanê di bin deshilatdariya rejîma Melayan de rû bi rûyê qonaxekî taybetî bûye.

Rejîma Komara Islamî her di yekem roja (piştî Şoreşa sala 1979'ê Zayînî) ku deshilat bi destve girt, gelek pirsgrêk û rojreşî bo xelkê Îranê tevî xwe aniye û yek ji van qatan ku diktatoriya melayan zortirîn gorî lê standine ciwanên kurd bûne.

Pişkekî zaf ji wê qata ciwan her di despêkê de, kakila dij bi azadî a Komara Islamî ji wan re kifş û eyan bibû û bi piştîvanî ji siyaseta û helwîstên partî û rêxistinên şoreşgerî dijberî siyaseta û helwestên şaş ên rijîma kevneparêz sekinî ne.

Komara Islamî li sala 1979'ê Zayînî û piştî bi destve girtina deshilatê şerekî naberamber bi ser xelkê Kurdistanê de seband, tenê ji ber wê ku gelê Kurd daxwaza mafên xwe yê rewa dikirin, bi terzekî hovane hatin tepserkirin û di encam de bi êrîşên leşkerî, wêranî û qir kirina xelkê ve deverê da hate dest pê kirin.

Em dikarin bêjin ku ev şere heta niha jî di form û metodên cur bi cur de dijberî gelê me dirêjî heye û di demê berxwedanê û berevanî kirina çekdarane û berheq ya gelê kurd, ciwanên kurd bûne sotiyê serekîyê vî agirî ku neyar û nehezên azadiyê ji bo gelê kurd di Îranê de hil kiribûn.

Vê rejîmê her tim dijberiya wê çendê kiriye û diket ku ciwanên Kurd nekarin armancên xwe destve binin û ji hemû îmkanatên xwendin û perwerde kirinê hatine bê par kirin. Çiqas ji destê wê rejîmê têt, ciwanan

digire, dikeve û îşkence diket, di girtîgehê de tûşê nexweşiyên din mîna: Îtîyad, fesad û reş binî derheq bi pêşerojê, hwd . . . diket.

Tevî wê çendê ku gelê Kurdistanê di 25 salên derbaz bûyî de her gav ketine ber tepeser kirin û şerê sebandî yê Komara Islamî û zarok û ciwanên kurd bi sedemên olî û neteweyî di xwendîngê û zanîngêhan de rû bi rûyê ferq û cudahiyeke zaf dibin û rijîmê rewşekî wisa pêk aniye ku her cure çalakî û liv û bizaveke ciwanan ji aliyê saziyên bi nav ewlekarî û tenahî yê rejîmê ve bi tundî dikevîne bin zêrevaniyê.



Hinek ji ciwanên Îranê mijûlê kişana muxediratê

Kurdistan a Îranê li gor herêm û bajarên din yê Îranê bi sedema siyaseta şaş û dijî gelî a komara Islamî, paşverûtirîn herêm di welatekî paşverû de ye û bê şolî ku arîşe û astengên herî mezin ên ciwana ye û Kurdistanê jî ku bi sedema şerê Îran û Îraqê derbekî giran jê ketiye û rejîmê tevgera rizgarîxwaz a gelê Kurd kiriye hêceta wê çendê ku xwe li ava kirin û damezarandina pirojeyên aborî di Kurdistanê de dûr bixe. Ji ber bêkariyê hijamarekî zaf ji ciwanan li sînorên Îraq û Tirkîyê mijolê karê qaçax bûne û di encam de gelek ji wan bûne goriyê teqîna mayînan ketine ber agirbarana çekdarên rejîmê, an jî ji bona peyda kirina bijîva bo malbatên xwe rû dikine bajarên mezin ên Îranê û dûr ji kes û karên xwe dijîn.

Aliyekî din, koçbar bûna ciwanên Kurdistanê ji bo welatên Rojavayî ye, bi sedema wê cehenema ku deshilatdarên Komara Islamî ji boy ciwanên Kurd pêk anîne bi awayên cur bi cur xwe digehîne Tirkîyê û li UNHCR'ê daxwaza penaberî û veguhastina xwe ji bo welatên din dikin.

Pirsgrêkekî din ku dibe îşare pê bihê kirin, xebat û tekoşîna saziyên tepeserker û bi nav ewlekarî yê rejîmê ye ku bi terzên cur bi cur ji bo şikandina kesayetiya şoreşvanî a ciawanên Kurd û tûş kirina wan bi mawada malwêlankere muxediratê ye.

Komara Islamî a Îranê zaf caran bi hêceta wê çendê ku Îran şademara tiranzîti a mawada muxedir ji bo Ewropa û dervey welat e û dibe pêşiya wê bihê girtin û mîna çekekî siyasî û aborî mifahê ji wê mijarê

werdigre. Ji ber wê ku yekem: Bi navê xebat dijberî mawada muxedir her sal bi dehan milyon Dolar alîkariyê ji kom û komeleyên navnetewî yê pêwendîdar bi xebat dijî mawada muxedir werdigre. Duyem: Dema ku di warê siyasî de di nava xelkê de hest bi tirsê diket, dest bi girtina xelkê, bi taybet qata ciwanan û belavkirina mawadê diket û bi wî terzî dixwaze ciwanan ji xebata berheq a xwe ku azadî û demokrasî ye dûr bimînin.

Komara Islamî ji rêya belavkirina mawada malxirabker û bi muitad kirina ciwanên Kurd, rê ji bona meşandin û peya kirina siyaseta xwe yê pîs û çepel xweş diket. Ji ber ku mirovê muitad ji bo bidestve anîna wê mawadê dikeve bin bandora hemû cure kiryarekê û tenê di hizra bidestve anîna wê mawadê daye.

Lewma rejîm bi belavkirina wê mawadê ne tenê ciwanan ji pirsên siyasî û xebat dijberî kewneparêziyê dûr dixê, belkî ji bona meşandina siyaseta dijî gelf yê xwe mifahê jê werdigre. Ji ber ku mirovê muitad îrade û helwesta wî di gireva wê mawadê de ye û bikar anîna wê dibe sedema wê çendê ku têkiliyên navbera endamên malbatên Muitadan bihê lawaz kirin û hetanî seha neteweyî jî ji bal wan bê pûte tê nişandan. Lê mixabin bi sedema siyaseta çewt ên rayedarên rejîma Komara Islamî ew belaya malxirabker mîna tişteke edetî di nava bajêr û bazar, îdare, xwendîngê û heta girtîngêhan de jî bi azadî tê peyda kirin û ji hemû kesê re eyan e ku rayedarên Komara Islamî di "tiranzîti" û belav kirina wê mawadê de rolekî serekî dilîzin.

Eger rejîma Komara Islamî maya xwe ji kar û barên welatên din de nedet û îmkanatên welatê me ji bo deste û gurûpên terorîstî mixizet neket û eger bi mezaxtina pareyekî zaf, sedan kes ji têkoşerên siyasî li dervey welat teror nekiribain her wiha dest bi kirîna çek û ava kirina girtîngêhan nekiriba, berevajî wan kiryanan eger li rêya mifah wergirtin ji çaxê bêşolî, dana zaniyariyên pêdivî li ser bandora xirab a madên bêhişker, darêtina bernameyekî bi ser û ber û pêkanîna rewşekî wekirî, derfetên şolî û misoger kirina jiyaneke serbixwe û dabîn kirina îmkanat û teknolojiyên pêwîst ên vî serdemî bo ciwanan bi kar anîba, bê şik ev hemû asteng û girêpêçk ji bo xelkê me, bi taybet ji bo ciwanan nedihatne pêş.

Lê mixabin hetanî dema ku sîbera komara Islamî li ser Îran û Kurdistanê be zêdebarê girêpêçkên ku hatinî bas kirin, dehan pirsgrêk û arîşeyên din jî wê bikevine rojva civaka Îranê.

Ku wisan e wezîfeya ser milê hemû aliyekê ye ku ji bo şiyar kirina xelkê Kurdistanê ji pîlan û kiryanên Komara Islam, xebat ji bo herifandina wê rejîmê û bi taybet rizgar kirina ciwanên welat ji wan arîşeyane ji çî hewl û xebatekê xemsarî nehê kirin û dibe ji her cure hewl û têkoşînekê mifah bihê wergirtin.

Jêder:

Kovara Lawan, hejmar 2,5,6,9,10

Zimanê me nasnameya me ye

✉:Azad Kurdî

a ê û î k b

Neteweya Kurd bi sedan salane ku ji bo azadî û serbestî ji zilm û zora dewletên dagîrker û bi merem û armanca bi dest ve anîna mafê berheqe çarenivîs û qedera xwe xebat û têkoşînê diket. Dîroka bizav û berxwedaniya îro ye Kurdan vedigere bo piştî şerê dîrokiye **Çaldîran**'ê di sala 1514'an de ku Kurdistan (welatê Kurdan) ji aliyê dagîrkeran ve hate pişk(parve) kirin û derfet û dem ji bo yeketî û hevîrtina gel bo gihîştina bi armancên dîrokiye xwe, pêk nehat. Perçe bûna Kurdistanê di nava 4 dewletên Îran, Tirkiye, Îraq û Sûriye bû sedema zaf pirsgirêk û arîşeyan û civaka me ya Kurdan heta niho jî nekariye pišta xwe di bin bandora wan pirsgirêkane rast biket, ku yek ji wan pirsane rewşa zimanê neteweyîye Kurdan e.

Em Kurd neteweyek bindest in. Dewletên dagîrkere Kurdistanê heta niha bi fermî dibêjin Kurdistan û Kurd tu neye! Ev siyaseta iflas û înkâr kirinê bandorê li ser nasnameya Kurdî diket. Ji her aliyekî ve asimilasyonêke dijwar û tund li ser Kurdan heye. Mixabin azadiya xwendin û nivîsandin bi zimanê Kurdî cuda ji Başûrê Kurdistanê, hêj tê tepeser kirin û derfeta şîn bûna gula zimanê Kurdî nayê dayîn.

Dema ku dewletek zimanê neteweyekê berbest û qedexe dike û bi hemû dezgehên xwe bixebite ku ev qedexe kirina di jiyânê de bimeşe, êdî ne hewce ye ku mirov zêde li ser girîngiya wî zimanî rabiweste. Ji ber ku ev girîngî xwe bi xwe derdikeve holê.

Gotinek pêşyan heye ku dibêje: **"Miletêkî bê ziman weke miroveke bê dil e"**. Yanî çawa ku mirovek di pêvajoya jiyana xwe de nikare bê dil bijî, neteweyek jî nikare bê ziamn bijî.

Pêwendiyên me yên nivîskî, civîn, pirtûk, kovar û rojnameyên ku em dixwînin bi zimanê dewletên dagîrker in. Li vê dinyaya ku her roj û bi lez diguhere, jiyân bi parastina ziman û çanda neteweyî mimkin e. Lewma hewce ye mirovên welatparêz girîngiya parastin, pêşde birin û vejandina zimanê neteweyîye xwe her car bînin ziman. Ev milletên, ku di pêvajoya jiyana xwe de zimanê xwe ne parastin û jê xwedî derneketin, li rûyê dinyayê de pênasaya neteweyîye wan nema!

Yek ji pîvanên herî girînge saxlemiya wêjeya neteweyekê, xwendevanên wê ne. Dema ku xwendevan kêmbibin, diyar dike ku di wêjeya wî gelfe de nesaxiyek heye. Ji gor vê pêvajoyê diviya doz û daxwazên zimanê Kurd, çand û hunera Kurdî bi rêk û pêktir derkevin rojevê. Her weke me bas kir, wêje, çand û zimanê neteweyî zor girîng in û Mirov dikare bibêje nîşaneyê hebûna her neteweyekê, çand, wêje û zimanê vî neteweyî ye.

Ev doz di Rojhilata Navîn de bi awayekî eşkere diyar e. Wekî mînak, di welatekî mîna Îranê de ku pir neteweyîye û ji ber ku li Îranê, li gelên wek: Kurd, Fars, Tirkman, Azerî, Erebi, Belûç û gelek kêmaniyên din tê de dijîn. Lê bi sedema siyaseta şovînistî, cuda ji Farsan, çî neteweyêke din rê pê nehatiye dayîn ku bi ziamnê xwe bixwînin û ji nasnameya xwe xwedî derkevin. Lewma bo me Kurdan parastin û xwedî derketin ji çand û zimanê neteweyîye me dibe pir girîng û binirx be.

Azadiya Başûrê Kurdistanê û ezmûna zimanê Kurdî

Her wekî me di destpêkê de jî bas kir, hetanî niho Kurdan tu deshilat û sistemek birêvebirinê (Ji bilî 11 meh jî temenê kurte Komara Demokratîke Kurdistanê li Mehabadê û 12 sal azadiya Kurdan li Kurdistanê Îraqê), ne bûne. Vê pirsgirêka mezin û zor tengasiyên din rê ji liv û xebata neteweyîye me bi awayekî sistematîk bo hîn bûn û parastina ziman, çand, û wêjeya Kurdî girtine. Helbet Kurdan daye selimandin ku li gor derfetên ku jêre afirîne, di hemû warên siyasî, civakî û çandî de pêngavên pêşdeçûnê avêtine. Mînaka Komara Demokratîke Kurdistan û Azadiya Başûrê Kurdistanê evê rastiyê bi başî eyan diket.

Di heyamê 12 sal azadiya Kurdan li Kurdistanê Îraqê de, di warê dewlemend kirina zimanê Kurdî de pêşketinên mezin çê bûne, lê ne bes in, gereke karekî mezintir û berfirehtir jêre bihê kirin. Azadiya ku di hemû waran de li Başûrê Kurdistanê pêk hatiyê, li ser liv û bizava Kurdên perçeyên dinê ye Kurdistanê ku daxwaza mafên xwe ên çandî, siyasî û civakî dikin, bê bandor nîne.

Di sedsala teknolojî û pêwendiyên de ku cihan mîna gundekî biçûk lê hatiye û teknîkê xwe gehandiye her derê. Em dikarin ji bo vejandin û dewlemend kirina ziman, çand û wêjeya gelê xwe bi rêya wan dezgehên ve rolekî pir aktîv û erênî bilîzin.

Erka perwerde kirina sistematîk û hîn bûna zimanê zikmakiye me (Kurdî) bila bibe armanca tev liv û xebatên me li Kurdistanê û hemû deverên cihanê de û derfet ji bo zarokên kurd - nemaze nifşa nû - were pêk anîn, ku li dibistan û xwendingehê hetanî asta bilinde xwendinê di zanîngehan de bi zimanê zikmakiye xwe bixwînin û binivîsînin û her wek ku ev mafe ji bo neteweyên serdeste Kurdistanê bi fermî hatiye nas kirin, dibe ji bo Kurdan jî wilo be.

Gotinên mezinan

○ Siwarê hespê xelkê her tim peya ye.

○ Bo her mirovekê çî peyvek ji navê wî şirîntir û çî gencineyek li jiyana vî mezintir nîne.

○ Mirovê xayîn li bin erdê be baştire heta ku li ser erdê be.

○ Sê tişt hene ku nabe direngî lê bête kirin. 1. Weşartina mirî, 2. Bi xêr anîna mêvan, 3. Bi şû dana kiça giheştî.

○ Bila mêrê egîd û xweşmêr qet tuxmê bê xîret û nebaş jê paş nekewin.

○ Bexteweriyek ku li mal da peyda nebe, li kolanan da peyda nabe.

○ Ev kesê ku hez çiyayê xwe neket, nikare ji deştê xelkê hez biket.

○ Ev kesê ku tifê li dayîka xwe biket, tifê li hemû afretekê diket.

○ Aferîn bo van kesan ku bi zimanê zikmakiyê xwe qise dikin û kilaman dibêjin û zimanê xwe wekî welatê xwe diparêzin.

○ Jiyana bê jin wekî çirayeke bê ronahiye.

○ Ger mal têr e, kaban şêr e.

○ Bê qewmî ji qewmê xirab çêtire.

○ Birîna xencerê çê dibe, lê birîna dijûnê çê nabe.

○ Kurmê darê ji xwe nebe, dar xuloxe nabe.

○ Nanê yekê bi avê da ço, got: bila xêra babê min bît.

○ Heta mirovek neaxive, kes nizane ka derevîne an rast bêje.

○ Mirovê wêrek serî bo çî tiştêkê naçewîne cida ji heq û rastiyê nebe.

○ Tirs birayê mirinê ye.

○ Guleke biçûk baxçeyêke mezin dixemilîne.

○ Baştirîn cih bo mirov, mala wî, bo şûr, kalan û bo dîtina dezgîran, rêya kaniyê ye.

Xewa êxsîriyê û xewna serbestiyê

✎: Dara Natiq

Li ewarek direng dema ku payîz xemilî bû, bi pelên reng reng, evrên reş û tarî per û paskên xwe bi ser esmanê welat de kêşan, gure gura evran bêdengi dixendiqand û xencerên tîje birûskan birînên kevnên welat nû dikirn. Top û balefirên neyaran xelatên mirinê dirêşandin, çavên zarokan dibûn xwedîka agir û mij û morînê. Tirimbêlên rêya mirinê mîna marên jehrîn û birîndar li çîran çepên rêya gundê me dihatin pêş, destên tirsê çavên min girtin û min nekarî çî din bibînim.

Piştî demekê min çavên xwe vekir, ax! min çî dît! Ev Marê birîndar xelesa xwe li dora gundê me alandibû, li ber her derekê turembêlek sekinîbû, dayikên girtî li pišta tîrokên hesin yê tirimbêlan gaziya zarokên xwe dikirin, lê destê wan ne digihîşt zarokan, di vê gavê zarokek sêvî digiriya û destên xwe ên biçûk ji dayîka xwe re dirêj kiribûn û digot: Ho dayê! Neçe, min nehêle! Kê dê şevan layî layiyan bo min bêje? Kê dê bibe diya min? kê dê bibe babê min? Lê dayîk bê bersiv dima.

Ez û pîre dayîka xwe li cem pencerê sekinî bûn, agirê dilê wan dayîkan û rondikên çavê zarokan cerg û hinavên min dişevitand.

Ez ketim nav hizrên xwe ên êxsîriyê, ên bindestî û roja dûr ya serbestiyê. Dîmena roja geş û her wisan roja reşa **Çarçira** yê û kaniya xwîna **Viyen** ê ku Kevokên aştiyê bi xwînê xemiland in û **Mikonos** a bêbextî û rojreşiyê û . . . dihatin ber çavê min.

Kul û kovanên bindestiyê hêdî hêdî li ser dilê min yê birîndar hêlûn çê dikir in. Ez bi dax û hesreta roja geşe azadiyê ketim xewê, xewa min agirê dilê min hênik dikir. Min seh dikir ez li esmanê welatê xwe yê azad difirim. Min dixwest şiyar bibim û rewşa welatê xwe yê azad bibînim, lê ez nekar bûm. Di vê gavê de, dengê xweşe kevokên Serhedê hate guhê min û çavên min hêdî hêdî vebûn, esmanek şîn û zelal di nava vê de rojek geş û azad bi min dikeniya. Ne cihê bavriyê bû, min seh dikir doma xewa mine, lê di vê gavê de dengê bilûra şivanekê bi ahenga **va hatin Pêşmergên me**, ez weciniqandim. Min carek din bala xwe da esmanê evrên reş û tarî nemabûn, ev şînkatiyên ku bi destê neyaran hatibûn şevitandin dîsan wegeryabûn hambêz çiyayan û çem û kanî dîsan diherikîn. Bêhnek xweş û xerîb dihat, ev ne bêhna dükêl û xwîn û barûtê bû, belkî bêhna xweşe azadiyê, bêhna serbestî û rizgariyê bû. Min bera xwe guhest û mêze kir, ah! Çi qas dîmenek bedew û ciwan bû, ez matmayî û heyirî mabûm, lê dîsan ez bawer nebûm, keç û xurtên gundê me bi cilên reng reng xemilî bûn û govenda serbestiyê girtibûn. Çi qas ciwan bû ev govend, di vê gavê de dengê gazi min kir û got: Ho! Lawo! Çima tu nahêye bigrî dîlanê çima tu nizanî îro roja **şervanên aşti û azadiyê**, roja **Pêşmergên Kurdistanê** ye.

Doma Şeva Yelda'ê, cejna ji dayik bûna Dr.Qasimlo pîroz be

Evî zatê mezin bi zane bûn û egîdî û cangoriya bê mînake xwe rêberiya Partiya Demokrat a Kurdistanê Îranê û tevgera rizgarîxwaziya Kurdên Rojhilatê Kurdistanê dikir û bi vê pêşengiya domdare xwe dixwest xebata gel bigehîne gupika serekîtinê. Dr. Qasimlo di vê pêvajoyê de bi siyaseta û zane bûna xwe karî Partiya Demokrat û gelê Kurd li Kurdistanê Îranê, ji gelek asteng û dijwariyên cur bi cur derbaz biket û bi her awayekê hawara Kurdên belengaz bigehîne cîhanê û bo yekemîn car saziyê Kurdî, mîna Partiya Demokrat di Entirnasionala Sosyalîst de bikete endam. Wî nemirî di jiyana siyasiya xwe de çendîn pirtûkên bihagiran mîna: Kurdistan û Kurd, Çil sal Xebat li pêxema azadiyê û zaf babetên dewlemende din . . . wekî xizîneyekê ji paş xwe bi çî hêlayê û bi vê xebat û baweriyên xwe, bo heta hetaya rêya xebat ji bo gihîştin bi azadî û jiyana bi serbestî ronahî kiriye.

Ji ber vê rastiya han bû ku dijminê zordar (Komara Islami) nekarî çavê xwe ji ber ronahiya vî rêberê zana û aştxwaz û navdar, weket. Lewma çehda temirandina ronahiya vî rêberê ku bibû hêviya gel û şoreşa Kurdistanê da, û di sala 1989'ê li bajarê Viyen a welatê Utrîşê bi terzekî necamêrî û dûr ji hemû pîrensîpên mirovanetiye, li ser maseya got û bêjên aştiyê teror kirin.

Lewma hewceye ku di her cejn û şahiyê **Şeva Yelda'ê** de tevî bir anîna Dr. Qasimlo, gelê Kurd û xebatkarên Demokrat bi nişaneyê emegnasî û hurmet girtin ji vî rêberê ku wekî şemalêk xwe şewitand, da ku bi ronahiya xwe rêya jiyana bi serbestiyê nişanî gel bidet, cejn û şahiyê bikin û bêjin ey ev kesê ku me bi dil tu hebandî, cejna ji dayik bûna te pîroz be.

Weke tê zanîn xasmaniya dîrokiye **Şeva Yelda'ê** di dema kevn de eva ye ku rê û resmekî kevnare Aryaiyan, rêvebirina cejn û xweşiya **Şeva Yelda'ê** bûye. Li gorî wan zaniyariyên dîrokî, serbihoriya rêve çûna rê û resma **Şeva Yelda'ê** dizivire bo berî ava bûna dewleta "Mad" ku 700 salan berî ji dayik bûna "Mesîh" ji aliyê Zerdestiyan ve rêve çûye.

Peyva "Yelda" Siryaniye, bi wateya zaîn, yan ji dayik bûnê ye. Felsefe û merama esliye rêve çûna cejna Yelda'ê pûte dan û ogriyek bûye ku zerdestiyan bi şînkati û çandiniyê hebûne. Bi gotinek din cotkar û xwedî zevî û zarên çandinê, di demekê da ku hasil û berhema çandina sala pêşîn xirî ser hev dikirin, bi serbiranêya dûmahî hatina çandiniya salekê û bi hêviya barîna berf û baranê, bi hizrekî asûde û bêxem bi pêşwaziya zistanê û sala pêşe rove diçûn û şeva daviya payizê, wekî serbiranêyeke xasmanî, dikirine cejn û şahî û govend. Hatiye gotin ku axir şeva payizê hevdem e tevî ji daik bûna mêhr "Mitra". Zerdestiyan ji dayik bûna pîroze "Mitra" di wê şevê de, bi şeva "Yelda" bi nav kirine û Yelda jî bi şeva "Wercawend" nav birine û ber vê hindê cejn girtine. "Wercawend bi wateya paqijî, pîrozî û dûr ji kirêtî û ne başiyê ye". Li çaxê Zerdestiyan da rê û resma Şeva Yelda'ê hêcetêk bûye ku malbat û xizim û kes û kar, bi hêjayî û evindarî li devra kalkên xwe bicivin û êmişê ter û xarina xweş û bitam bixon û bi şahî û stran û dîlanê, dûr ji her cure xem û xudûkî û nexweşiyekê, wê şevê bi hev re derbaz bikin. Yelda di axir şeva meha Sermawezê da, ku sipêdehiya wê hevdem e tevî yekem roja zistanê, rêve diçe. Yanî bi roj avabûna dawitirîn roja payizê, dest pê diket û hetanî roj hilatina yekem roja zistanê dom diket.

Şeva Yelda dirêjtirîn şeva salê bi hesab tê û hemberî vê de jî roja yekeme zistanê û çilê mezin, bi kurttirîn roja salê tê hijmartin. Rê û resma Şeva Yelda her wekî hate bas kirin di dirêjtirîn şeva sala "Felata" Îranê de rêve diçe. Niha ji aliyê: Efxaniyan, Tacikan, Gurciyan, Ermeniyan, Îraniyan ve rêve diçe. her wisa pişkek ji Belûçên Pakistanê û Parsiyên Hindostanê, jî rê û resma Şeva Yelda'ê bi ser û bereke xasmanî rêve dibin.

Her çend rê û resma Şeva Yelda'ê gelek berî ji dayik bûna "Mesîh" rêve çûye, lê Mesîhiyan di sedsala çardê ye Zayînî da, ev şeva hevdem tevî ji dayik bûna İsa Mesîh danîne. Ji ber wê ku tevî cejnên serê sala Mesîhiya û cejna mezine "Kellîmiyan", "Henokan" tenê çend roj navber heye. Wekî dizanin ew rê û resme wekî resmeke kevnar bo me bi dîharî maye û bi çavê qedr û hurmet ve tê mêze kirin û wekî pêwajoyekê, malbat û xizim û kes û karan bo xurt kirina tebahî û yekdîlî û qasa xweştîvî bûna navbera wan, bi xweşî û şadî tê girtin.

Çavkani:

Govara **İlm û camie**
Fehenga **Eelî Ekber Dêhxuda**.

Gaziya welat

✎: Emîr Şuaîwend

Rojek zarok bûy û sawa, îro tu bûyî pêşmerge
Rojek hambêza diya te
Evîngeha dilê te bû,
Îro hambêza çiyayan
Ji te ra bûne evîngeh
Rojek şîrê dayika te
Aramiya can û giriyan,
Îro tîfinga milê te
Aram diket
Cerg û dilan
Îro, dayik bûye niştiman,
Dî hambêza vê dayikê
Kom bi kom
Gulên bedev gulên ciwan
Pêşmerge, ji xwe re
Kirine mêvan
Ho Pêşmerge !?
Tu dizanî payiz
Ji ber xemla roja te
Hêj pelgên xwe
Newerandine?
Yan tu dizanî ?
Reşe bayên payizê
Hêj nekarîne
Li hambêza zozanan
Bidizin sosin û beybûnan?
Ho gaziya welat
Ey behra bê sînora evîne
Lê birêne
58 pelpelîskên evîndar
Li der dora bûka baranê
Çi qas ciwan. . .
Ji te ra, Ey Reqîbê
Distirin
Û hambêz hambêz gulên
sipî
Bi rengê te
Bi rengê aşti
Û bi rengê sermawez
Dikin xelat
Û dirêşînin
Bi ser bejna welatê te
Dê tu rabe
Xemla xwe girêde
Bi çek û rextan
Li serê çiyayên kurdistanê
Bilêline vê çeka xwe
Bila dengê vê
Bibe mizginiya xilasiyê
Û serbestiyê

Xweş biket

Dilê zarokên sêvî û

Taze bûkên dax dar

Û gritiyên

Li ber guneha azadiyê

Û her wisa

Pîroz biket roja te

Hey Pêşmerge

Evîngeha bin dara Çinarê

✎ : Mihemed Resûl Hesênûr

Qendîl eliheke birîndar bû, kurîşkên ser eniya wî bibûne girê û ber bi rojhilat dinêrî. Çavên vî wekî du golên xwînê sor bibûn û te digot qey burkaneke ku peşqelên agir bo her aliyekê belav diket.

Di kêleka Qendîlê de çend darên hişk bûyî destên xwe bo aliyê esman bilind kiribûn û tika û lahî dikirin. Li derdora wan de komek darên serbiryayî, wekî komek singan di kûrahiya axê de çeqiya bûn.

Rê ewrazeke kûr bû ku ber bi jor dikişiya, du aliyên rê bi gulên al al û şîlêran wekî du evîndarên dil birîndar serê xwe gihandibûne ber peleguha hev û du. Sele Beran kit kite di nava şînkatiyê de weşartko dikirin.

Deştahî mijûlê çinîna gul û peligên şîr bû, da ku bejna Qendîlê pê bixemilîne. Evîndar hêdî hêdî lingên xwe li pey xwe radikêşand û avirek daye aliyê daran û axînek kûr ji kûrahiya dilê xwe kişand. Darên bê guneh ketibûne ber êrîşa bivirên bê rehm û tevî lêdana her bivirekê, birînek di hundirê wî de serî dihilani û tevî cokên di nava şîngan de dikete giriyê, coke jî çikiya bûn û bi salan bû ku rondik ji wan xeyîdî bûn.

Dîmena dar û berên kavilan serbarê birînen dinê bûn û vî bi dilekî pir hesret wa çavên xwe miqandin û got:

Ax û sed dax! Demek bû ku dar û berên vê deverê di hembêza hev de rihet raketibûn û dest dabûne destê hev û malên xaşik çê kiribûn. Bejna darên şîr kiroşkî dikirin, cokên ku niha ziha bûne, hingê teratî û nêmezgeha avê lê digeriya. Çîmenê derdora wan ev der xemilandibûn.

Ev bejn bilindê bi heybet li bin sîbera dar çinarê de ketibû evîngeha pirtûkê û dixwand û bi dengê bilind dubare dikir. Ji aliyê din komek ciwanan gengeşe dikirin û digotin: Erê ev mamostaye (Qasimlo) dîn nebûye!? Yek ji wan bi dengê bilind gazî mamosta kir û got: Tu ji kêra dixwînî? Xwe kes bal te nine!

Mamosta bersiv da û got: çawan ji kêra! Bo daran, bo keviran, bo wan çiya û geliyane, bo esmanê şîne vê Kurdistanê û . . . Ma hûn nizanin zarokên me ji Elf û Bêyan hatine bê par kirin . . . Bila em ji dar û beran ra bêjin û ewan hîn bikin ku çawa peyvyan biparêzin. Eger na, vê rojek bêt ku ne pîrek, ne ciwanek, ne jî zarokek, nikare Elf û Bêyan ji hev cuda biket. Lewma dibe kune ber û eteka vî çiyayî tijî ji tîpên: K,U,R,D, bikin û her rojekê ku hewce bûn, derînin.

Ciwanan got: Bi xudê ecêbe!! Mamosta got: Ecêb nine ez evîndarê wan dar û kevirane me! Dîn û bendewarê wan çiya û geliyane me. Eva ez dibînim li ber çavê we xuya nine. Ez dûr dinêrim û dizanim ve pêdvî bi hîn bûnê heye. Lawên çav geşe min, hûnin hêviya pêşeroja wî gelfî, qet guh nedne gotinên dijminan, zimanê wan jehrîn e û dixwazin we ji zimanê dayîkê, ji welat, ji dîroka bav û bapîran warî bikin. Bila ev her bêjin, hûn guhê xwe nednê. Bi salane ku ev zirneya bê pîk lê didin û dihola zik diriyayî dikutin û dibêjin: Ve esl û binetar nine û hûn têtjikên Roviyan in! We welat tu neye û hûn bê ziman û bê dîrok in!


Bapîrên me ji wan hatine dest, lê zimanê wan hate birîn û ava tehil bi gewriya wan da kirin. Lê bila ev baş bizanin ku ez kurê medya me û welatê min jî wan re xerîbe û dibê jê derkevin. Lêre kevirê nine ku ev serê xwe pê bişkênin. Vê rê ji wan bizir be û li ser raze beran re bikevine xwar û pirtî pirtî bibin. Sîbera darên welatê min jî ji wan re xerîbe û nikarin demekê li bin de bêhna xwe wedin û xuha westyana xwe damal in. Bil Bil jî ji wan re na xwînin.

Çav geşên min! Guh ji min bigrin: Hûn kevirê xîmê pêşeroja vî welatî ne, dibe hûn kevir li ser kevir danên û welatê xwe ava bikin. Eger herifî, dil giran nebin, carek dîn, hezar carên din vî karî dubare bikin.

Rast e ku mij û moran, bahoz û babelisk, reşe ba û şeva zîlmat e, lê her tiştêkê dawiya xwe heye û dibe di sînorê xwe de bihête rawestandî.

Başe ve ji çi kêm heye? Xwedî dîrok ninin, ku hene, xwedî ziman ninin, ku hene, zimanê ve ji zimanê neyaran xaşiketir nine, ku heye, xwedî welat ninin, ku hene, lê welatê ve wekî bûka bê miraz e . . .

Feleka xayîn çî din bi wî mamsotayî rewa nedît û ji evîngehê cuda kir. Lê evî dîsan her şîretên xwe berdewam dikirin. Neyaran eve jî ji wî rewa nedîtin û wê carê bi aliyê xelkekî bîhanî dîr êxistin û li vê derê jî nehêlan bisitir e. Daska mirinê ya şev hebînan li cendekê wî dan û evî kire hewar, kes di hawara wî de nehat û kesê bera xwe nedayê. Bi neçarî dest li ser birîna xwe danî û bera xwe daye Rojhilatê, dîr dîr gazî kir û got: Xwestiviyên min! Li min biborin, neyaran derfet nedane min, min gelek got û hawar û gazî kir, lê nizanin ka deng da yan na? Li min biborin, çend dilopek xwîn li demarên



min de mane, ezê ji we ra bişîn im bila kêmek tîniyatiya ve bişkêne. Li min qebûl bikin, bila yadigarek biçûk be bal we û bibîte al alek û sing û berê çiyayên bilinde welatê min pê bixemlîn in.

Stêrkan şîr û tazî girêdan, çiyayên welat hor hor digiriyan û rondikên şor diherikandin, masiyan xwe di bin kewza ava kanî û çeman de mat kiribûn, beqan jî di nava golmekan de diqurndin, Kunda biyom jî pîqa pîqa vê bû û dikeniya, şev peristan jî girtibûne govend û dîlanê.

Dara çinarê konê sîbera xwe veda bû û rehên xwe di kûrahiya axê de çeqandibûn. Bivirê nezan wekî kelbên gurê har û bîrsî li gerdena daran diçeqiya û yek yek diqetandin. Ku nobeya dara çinarê hat, vê got: Evîndar te cî nahêlim xwestiviyê minê ezîz, ger bejna min jî bibirin rehên min bi kûrahiya axê de çeqiyane û di şeqa keviran de çûne xwar û her yek ji wan vê bibin hezaran şêne û çinarên din.

Nişkê ve dengê kire hawar û hemû aliyek tevlihev bûn, dar, kevir, çiya, mamosta bi pirtûkên xwe ve bi hawar û yekdeng dikir gazî û digot: Ez jî li gel we me, hezaran firsex ji ve dîr, li welatê gor xerîbiyê da, dikeme hawar, da ku perên pirtûkên min di nav dar û berên wî welatî de belav bibin û her yek ji wan rûpeleke dîrokê bo ve hildin û bila li derdora cokê de bêne xwar û mêzeyî daran bikin û bibînin ku daran dîsan çilo dane û li paş xwe binêrin û bibînin ku Qendîl her wisan ser bilind rawestiya ye û serê wî di nav seran de diyar e û çirûskan bo her aliyekê belav diket.

Biryarên Kongira PENa

Navneteweyî li ser kurdan



Kongreya 69an ya PENa Navneteweyî li paytexta Mêksikoyê bi amadebûna 250 beşdarên ve, ku nûnerên 65 Navendên PENên Neteweyî ne, ji 22 heta 28'ê Mijdar'a sala 2003an pêk hat. Gelek hevdîtinên berdâr, gotûbêjên bi nîrx û civînên wêjeyî Kongreya îsal xemilandin. Ji 32 biryarnameyên (rezolûsiyonên) Kongreya 69an ya PENa Navneteweyî, 3 biryarnamê bi Kurdan ve girêdayî ne.

Biryarnameya li ser Mafên Zimên ji bona Kurdên Tirkîye, Îran û Sûriyê

Civîna Giştî ya Beşdarên Kongreya 69an ya PENa Navneteweyî li paytexta Mêksikoyê, Mexico City, 22-28 Mijdara 2003an

Bi bir tîne, ku civaka bi zimanê kurdî dipeyve, bi giraniya erdnîgariya xwe di navbera çar dewletan de dijî: Komara Tirkîyê, Komara Îslamî a Îranê, Îraqê û Sûriyê;

Herweha **bi bir tîne**, ku ji bilî li Îraqê, zimanê kurdî û wêjeya kurdî ji hêla van dewletên din ve nayê parastin û di dibistanan de perwerde pê nayê kirin;

Bawer dike, ku mafê axaftin, xwendin û perwerdekirina bi zimanê zikmakî mîna mafekî jidayîkbûnê ye û pîvana gotûbêjên aştiyane di navbera gelan de ye;

Bawer dike, ku lewma mafê Kurdan heye wek hemû neteweyên cîhanê bi rêya astiyane biryara xwe bistîne, ew kîjan zimanî dixebitîne û kîjan wêjeyê dixwîne;

Bi tundî tîne bira hemû hukumetan, ku li gor armanca UNESCO di derheqa Pirrengiya Çandî de mafên bingehîn û wekhevîyê ji bona her beşekî hemwelatîyên wan in û ew zengîniyê didine civaka sîvîl, hevqenciya komên ku bi zimanên curbicur diaxivin, asantir dikin û bi vî awayî rê didine pêşketina aştiyane û demokratîk;

Hukumetên van dewletan **hişyar dike**, ku ew divêt mafên bingehîn yê

hemû zimanên kêmneteweyan di herêmên wan yê neteweyî de biparêzin û bi vî awayî nehêlin, ku aloziyên bêkêr di navbera çandan de zîrarê bigihînin xaka dewletan;

Banga birêvebirên Tirk, Îran û Sûriyê **dike**, ku ew dewlemendiya ziman û wêjeya kurdî binasin û hemû qanûnên li dijî pirrengiya xwezayî di ware zimanan de rakin. Di heman demê de **bang**a birêvebirên Îraqê **dike**, ku ew jî belêna (soza) xwe cihbich bikin û piştgiriya zimanê kurdî bikin.

Biryarnameya li ser Sûriyê di derbareya binçavkirina Merwan Osman de

Civîna Giştî ya Beşdarên Kongreya 69an ya PENa Navneteweyî li paytexta Mêksikoyê, Mexico City, 22-28 Mijdara 2003an

Protesto dike, ji ber ku binçavkirina nivîskar, helbestvan û endamê Navenda PENa Kurd birêz Merwan Osman hên jî dewam dike û Dadgeha Ewlekarîya Dewletê ya Sûriyê doza wî vekirîye û wî bi 'cudahkirina dîn û nijadan' tawanabar dike;

Bi qelem dike, ku Merwan Osman 10'ê Kanûna sala 2002an bi boneya xwepêşandana aştiyane hatibû binçavkirin û eger wek gunehkar were dîtin, girtineke heta 15 salan jêre lêdikeve. Ev xwepêşandan ji hêla Partiya Yekîtiya Demokrat a Kurd li Sûriyê (Yekîti) bi daxwaza parastina mafên Kurdên ku hemwelatîyên Sûriyê ne, pêk hatibû;

Bawer dike, ku dewamkirina binçavkirina Merwan Osman li dijî mafê azadiya raman û civînan e; ev maf di Peymana Navneteweyî li ser Mafên Civakî û Remyarî de (International Covenant on Civil and Political Rights) hatiye misogerkirin û Sûriyê bi xwe jî ev Peyman destnîşan kiriye;

Daxwaz dike, ku birêvebirên Sûriyê bi şeweyekî mirovane - heta Merwan Osman binçavkirî bimîne - pêre bidin û bistînin; Banga rizgarkirina Merwan Osman ya lezgîn û bê merc **dike**.

Biryarnameya li ser Tirkîyê di derbareya Girtina Leyla Zana de

Civîna Giştî ya Beşdarên Kongreya 69an ya PENa Navneteweyî li paytexta Mêksikoyê, Mexico City, 22-28 Mijdara 2003an

Xemgîniyêke kûr nişan dide, ku serkêşa mafên Kurdan, siyasetvan û nivîskar **Leyla Zana** hên jî di girtîgehê

de ye, herçend 21'ê Mijdar a sala 2003an êdî dozguhdarkirina nehan li hember wê çê bûbû;

Bi qelem dike, ku Leyla Zana hatibû tawanbarkirin, ku ew endama Partiya Karkerên Kurdistan (PKK) bû, lêbelê di doza wê de lihevnehatinên berfireh hebûn û lewma PEN digel çavdêrên din gihîştine vê encamê, ku Leyla Zana ji ber piştgiriya mafên Kurdan yê aştiyane û qanûnî hatibû cezakerin;

Vê berxweketinê parve dike, ya ku ji hêla saziyên navneteweyî û berî her tiştî Dadgeha Ewropî ya Mafên Mirovan ve hatiye diyarkirin, ku doza Leyla Zana û sê siyasetvanên Kurd, yê ku di sala 1994an de bi hev re hatibûn cezakerin, dozeke ne durist bû; herweha dozguhdarkirina nû jî wek berê bi guman e;

Bal dikişîne, ku Leyla Zana di girtîgehê de bû, gava di sala 1998an de du salên cezayê bi ser cezayê berê de hatibûn zêdekirin; sedema cezayê nû nivîsên wê ji girtîgehê bûn û ev yek perçiqandineke din ya mafên mirovan e, bi taybetî Beşê 19 yê Peymana Ewropî li ser Mafên Mirovan, yê ku Tirkîyê bi xwe jî destnîşan kiriye;

Herweha bal dikişîne, ku niha li Tirkîyê doz li dijî gelek nivîskar û weşangerên din jî hatine vekirin, ji ber ku ew bi kêşeya kurdî ve mijûl dibin;

* **Banga** wan birêvebirên dadê dike, yê ku serperîştîya doza Leyla Zana dikin, ku ew heta encama dozguhdarkirina nû bi lezgîn were berdan;

* **Daxwaz dike**, ku dadgeh rexneyên navneteweyî bi giranî di ber çavan re derbas bike, hem rexneyên di warê doza berê de, hem jî rexneyên teze, ku li hember dozguhdarkirina nû derdikevin holê;

* **Hêvidariya xwe nişan dide**, ku encama doza niha wê rizgarkirina Leyla Zana be;

* **Herweha bang dike**, ku qanûn û zagonên Tirkîyê ji nû ve werin nirxandin, da ku bingeha cezakerîna nivîskar û weşangerên ku li gor mafê raman û civîna azad dixebitin, nemîne; hukumeta Tirkîyê ev maf ji xwe re kiribû armanc û bi vî awayî Peymana Ewropî li ser Mafên Mirovan destnîşan kiriye.

Jêder: www.pen-kurd.org

agiri

Rojnameyeke siyasî û
çandiye, Partiya Demokrat a
Kurdistana Îranê diweşîne
Hejmara 2, December'a 2003

Navnîşan:

AFK
B.P. 102- 75623 Paris
CEDEX 13 –FRANCE

www.kurdistanmedia.com/kurmanci.htm

Email:

Rojnama_agiri@yahoo.com

Fax: 0012703425105

Bo Agirî binivîsinin

Eger bo Agirî dinivîsin ji kerema
xwe van xalên jêrîn berçav bigirin:

* Çi nivîsek bê nav û nîşan nayê
weşandin. Nivîskar dikare navê
dîlxwaz bo nivîsa xwe hilbijêr e,
Digel navê dîlxwaz ji kerema xwe
navê xwe yê rastî bo rojnamê
bişînin.

* Eger nivîskar ji bo nivîsîn û
berhev kirina mijara xwe ji
çavkaniyan mîfah wergirtibe,
hewce ye îşare bi van jêderan biket.

* Ev nivîsên ku li zimanên biyanî
hatibin wergêrandin, hewce ye
îşare pê bê kirin û nav û nîşana
jêderê jî bihê dest nîşan kirin.

* Hindî bikarin wêne, xerîte û
belgenamên hewce tevî nivîsan bo
me bişînin.

Desteka nivîskarên
Rojnameya Agirî mafê wê
gendê heye ku:

Destêwerdana rênûsa nivîsan biket.
Van mijar û babetên ku naverokek
lawaz hebin belav neket.



Pîrozbahî


Sexmeratî hatina sersala nû ya 2004'ê
Zayînî û cejna ji dayîk bûna Îsa Mesîh, ji
aliyê rojnameya Agirî ve tevî bedevtirîn
pîrozbahiyên ji hemû gelên cîhan û
Kurdistanê, hêviya saleke pir xêr û xweşî
û dûr ji arîşeyan bo hemû aliyekê daxwaz
dikin û bila sala nû bibe sala serketina
aşti, azadî û tenahiyê li hemberî şer û
dîktatorî û terorîzmê.

Şeva Yelda'ê, cejna ji dayîk bûna Dr.Qasimlo pîroz be

✉: Mihemed Salih Qadirî

Xweşî û şahiya **Şeva Yelda'ê** bo gelê
Kurd û xebatkarên demokrat ev afirandin
û xasmaniye heye ku di **Şeva Yelda** ya
sala 1930'an de berî vê ku tîrojken rojê
bipişkivin, li malbateke welatparêze
Kurdên Urmîyê de mizgîniya ji dayîk bûn
û dest pê kirina jiyana helalzadeyekê
hate ragihandin û ji ber dilovanî û
bedeviyê, nav lê danîn: **Ebdulrehman
Qasimlo**.

Ev Qasimloyê ku li devera **Medya** û
herêma **Zerdeşt'ê** kale hizrvanê: Hizra
baş, gotina baş û kiriyara baş, di kêleka
Kela **Xanê Dim Dim** û di meydana
xebata Simko'ê Şikak de hatibû dinê,
paşî xwe famandinê, ji kûratiya dil ve
seh bi bindestî û bê pariya gelê xwe
(Kurd) kir û tevî xwe teyar kirin bi çeka
zanîstê û bi dawî kirina qonaxên
xwendinê, ku heta pileya Dukturayê çu
pêş, dakete nava meydana xebata




Dr. Qasimlo

azadîxwaziya gelê Kurd û
zêdetir ji 40 salan ji
temenê şîrîn û bihagirane
xwe di vê pêvajoyê de
bihorand.

Doma wê 17

Girtina Sedam Husên, Serok Komarê berê ye Îraqê



Demijmêr 8:30 deqîqe
a piştînivroya roja şemî
22'yê Sermawez'a
1382'ye Rojî Sedam

Husên, Serok Komarê berê ye Îraqê li
veşartgehekî nêzik bajarê Tikrît'ê ji aliyê hêzên
Emerîkayî ve bê teqe û lêkdan hate girtin.

Girtina Sedam Husên li rastî de wekî xala
dawî hatin bi deshilata Partiya Beis li Îraqê tê
hesibandin û bû sedema kêfxweşiya xelkê wî
welatî li bajar û deverên cuda cuda de.

Bêşik qedera Sedam Husên û hukûmeta Beis
çarenivîsa her dîktator û deshilateke serberedayî
û hemû wan kesane ye ku li hemberî azadî û
mafê miroviye xelkê welatê xwe de radiwestin û
li encam dana kiriyarên cinayetkarane xwe na
parêzin û ji bo domandina deshilata xwe penayê
bo her cure riftareke hov û nemirovane dibin.